




元李五峯先生集
舊本秘冊
明弘治年鈔本
項聖謨所藏
康熙癸卯夏
重裝別集類

承 假 五 年 集 板 兩 卷 多
可 是 已 中 致 因 性 也
何 曰 古 卷 一 清 岩 再 走 訪 民 誌
付 翁 先 生 考 安 甚 為 中 十 少 也

李五峰集序

予未登仕時嘗讀元詩體要至五峰李季和先生之作
受其風采豪邁不染指于脂韋靡麗之場不掉鞅於鬼
斧蛇神之域震奮如雷霆動運如日月變幻如鬼神春
容如長江大河一瀉千里奔放如洪濤巨浸揭日掀天
清圓如拓彈銅丸迅飛霄漢心與之競而不暇焉雄哉
先生之文也第以僅十餘篇而止不得其全集為恨於
乎是心也非獨予為然而天下士莫不皆然予嘗試春
官會天下士於京師或論詩家風格未始不以五峰首
稱而以未見全集為歎比銓曹擢予知樂清拜命之日
私竊自慶以為樂清乃五峰先生所自出之地全集必



NATIONAL CENTRAL LIBRARY, TAIWAN, R.O.C

有珍藏於士大夫之篋笥者則是行實與先生有厚焉
焉到官初謁先聖先師因詣鄉賢祠見諸先正而先生
牌位未立故補次於龜齡王先生之左案牘稍暇訪厥
遺稿於士林或得其斷簡或得其殘編而其全集又未
克即覩嗚呼文章之顯晦豈運盛衰之所關乎天下風
氣醇醜先生之文其必乘時以顯未必終晦也居無何
儒生周綸以其所藏於篋笥者獻於庭予驟得之不啻
獲拱壁夜光喜不自寐者凡幾綸亦知詩士也遂命之
編其類次於是捐俸以繡諸梓將與天下共焉夫詩之
近體莫盛於唐而唐之盛莫盛於天寶其間亦未免有
大而肆夏小而流離之失先生無是也矧先生碩德重

望膺元聘起爲秘書閣以文章見高一世史稱先生非
先秦西漢語不道則先生之文取重于當時見稱于後
世非一日矣良金美玉自有定價豈區區一日用心爲
先生增重耶雖然使先生之文而有傳耶于先生固無
所增加使先生之文而無傳耶先生亦無所增損赫赫
之光與日月同垂於不朽者固自若也不曰先生之文
傳不傳于吾邦風氣之美不美係耶晚生末學之幸不
幸係耶集成借書以爲天下想望先生之文者告時弘
治甲子歲菊節鄉進士知樂清縣事鳳陽懷遠慎齋
錢杲書於忠愛堂

帝鄉人

東

琴堂
清暇

元李五峰先生逸文目

南村草堂記 見華亭志

郭翼遷善齋記 見崑山志

姚文奐書聲齋記

孝善坊記 見蕩南集



李五峰文集

元李孝光

樂府詩集序

太原郭茂倩所輯樂府詩百卷上采堯舜時歌謠下迄於唐而置次起漢郊祀茂倩欲因以爲四詩之續耳郊祀若頌鏡歌鼓吹若雅琴曲雜詩若國風以其始漢故題云樂府詩樂府者教樂之官也於殷曰瞽宗周曰殷周官又有大司樂之屬至漢乃有樂府名茂倩雜取詩謠不可以皆被之弦歌且後人所作弗中於古率成於侈心猶錄而不削其意或有屬也歲久將弗傳監察御史濟南彭叔儀父前得其書手自校讎正其缺謄及是



NATIONAL CENTRAL LIBRARY, TAIWAN, R.O.C.

更購求善本吳越之間重爲校之使文學童萬元刻諸
學官曰將使世之學士皆得受業焉上且興禮樂此足
爲之兆屬孝光序之孝光曰昔者聖人之作樂豈天地
之和達萬物之情其德神明矣徒心耳之娛哉凡樂之
制羣聖人所增更至於周而大脩周之歌樂盡聖人之
徒之所自作其報祀天地百神又皆遵用黃帝堯舜禹
湯之樂舞宗廟之中神且下則奏九德之歌九磬之舞
舞招舞也歌招詩也然則魯雲門以下樂皆自有歌因
可知矣周時於黃帝堯舜相去二千有餘歲而樂由不
壞由先王世世肄業存以遺後聖故周公爲樂頗遵用
之是皆羣聖人之所作宜乎動盪天地變化國俗曾不

崇朝而後致或稱伏羲之立基神農之下謀祝融之屬
續顓頊之五莖帝嚳之六英以質故弗用余曰不然豈
其制久而遂不可復索意周公不能無遺恨而使猶
有存者則周公並用之矣自漢高時爲武德之舞駉用
招舞而更曰文始武舞而更曰五行又曰秦樂人制宗
廟樂詩三侯之章而房中樂楚聲至今唐山夫人爲歌
及孝武世益爲十九章則有宛馬產芝白麟赤蛟之物
以明得意至是聖制遂泯而黃帝以下之詩於是始併
亡矣此非獨漢過秦已帝秦以爲功德上兼三五改古
制度不師聖哲弃先王之道弗復用漢因而不修過秦
過也漢不得不任之且公子完去陳虞招猶不廢田仲

微大夫也負檐流離之際不敢失墜誠令漢訪求之是時去古未遠什二三倘可得也孔子至自衛歎曰吾自衛及魯然後樂正雅頌各得其所乃取殷周之詩皆絃歌之以求夫韶武雅頌之音孔子所為歎殆周公之意也然則後之繼周者盍亦思其本矣由今論之殷周之詩具在漢至于唐若茂倩所次又弗可考遺其所不可知而講其所可知其殆庶幾乎余嘗竊謂周漢視六代其微辭顯義不及昔茲益交聞叔儀父言又深有感於不削之意故爲具著以俟

至元六年十二月乙巳永嘉李孝光謹序

蕭山縣公署記蕭山志

會稽屬縣蕭山漢餘暨也吳曰永興唐始以山名蕭山土地陋故宋都吳時以北縣淳祐中令高曆大起居治作堂曰翠簾自曆至今日有餘歲風雨飄搖墉屋撓缺吏失威重民慢勿莊至元五年居延崔侯嘉訥爲縣尹中誠病之未敢以爲功乃務先利安斯民恩勤顧省視如其家民滋信尹會是歲大熟賦平人和進其耆艾而告之將作居治皆應曰我且率子弟以共凡役于是鳩工度材因其故制而拓之隆之相地卑濕增高其址乃作廳事次賓幕次吏舍以及大門東西廡庫度次舍度其南作譙樓置鼓又少南作觀化之亭以居察民之所好惡凡役皆次第以成而侯且代去縣尹李侯守其

政如崔侯適主簿劉君伯煥至共踵成之益使爲丹雘
塗墍砥甃樹垣植松柏于庭至是民思尹而曰我見諸
吏賦功未有不漁民于是役不以病我其意常恐傷我
此德厚宜報乃謀樹刻石余以爲善保民者其民思報
之保民者仁民也自崔侯之去今五年矣民猶不能忘
而將報其德噫崔侯庶幾知保民矣夫令受人於上不
難于治民而誠仁民之爲難治民者固多爲之防嚴爲
之制以禁其邪僻之行伐其悖淫之思期無犯刑止耳
仁民异于是寒往衣之饑往食之無以爲居舍之又唯
憂其或墜于惡道之德以絕其詭行養其仁以易其邪
思習之禮以消其异習朝姬夕煦若顧赤子故民亦以

爲上常仁我而未常厲我父母事其上而不怨由保民
也觀于豳風之詩其曰八月載績載玄載黃爲公子裳
又曰取彼狐狸爲公子裘以報衣也其曰躋彼公堂稱
彼兕觥以報飲食也其曰上入執宮功晝爾于茅室爾
索綯亟其乘屋其始播百穀以報居室也其所爲報勞
于趨工非有驅迫狗戒之者上以此仁之下以此報之
若初無所事而其效自至嗚呼仁哉此真于治民者殆
有間矣今不肖不慮此既不能保又不能治甚者愚其
民以自殖不得所欲則下苛政以厲之民且仇之矣今
民思我尹果遵何德而至是吾故曰崔侯庶幾知保民
者矣

王貞婦傳 嶧縣志

至元十三年冬王師南至貞婦夫舅姑俱被執師中千夫將見婦色麗乃盡殺其舅姑與夫而欲私之王嬭憤痛自殺千夫奪挽不得殺責俘囚婦人雜守之婦欲死不得間自念當被污即佯曰若殺吾舅姑與夫而求私我所為妻妾者欲我終善事主君也吾舅姑與夫死我不為之哀是不天也不天君焉用我為願請為服暮月苟不聽我我終死耳不能為若妻也千夫畏其不難死許之然愈堅置守明年春師行擊行至嶧嶧守者信之滋益懈過青楓嶺上婦仰天竊歎曰吾得死所矣乃嚙拇指出血口占詩山石上已南向望哭自投崖下而

死或視血則血清入石間盡以化為石天且陰雨復見血墳起如始日當是時后妃嬭嬭不死之三么九卿不死之郡國守邊大吏不死之而貞婦獨守死下從舅姑與夫獨何人也夫秉彜之性靡不有乃匹夫匹婦出之遂以驚動萬世苟人人慮此則金湯不足喻其固矣鉤戟不足喻其利矣勇士不足喻其強矣河有亡國債家之憂彼貞婦何為者顧奮為烈丈夫之所不必為彼宜為而有不為悲夫會稽嶧丞徐瑞為起石屋樹碑廟中以旌其鬼焉余曰始吾見長老言貞婦所從死不能悲也後身過其地見指血化為石追念貞婦決死時傍徨悲傷不能去豈其鬼未泯尚猶感人耶嗟夫匹夫匹婦

顛沛流離誠能動天如此天豈遠人哉天豈遠人哉

雁山十記

元李孝光

始入雁山觀石梁記

予家距雁山五里近四方客遊者或舍止吾家吾歲率三四至山中每一至常如遇故人萬里外泰定元年冬十一月予與客張子約陳叔夏復來他日從小筍用自愒晝為餽糧食給夕則舍頓床敷恒衡于吾心而莫得縱于是盡屏去之獨從家僮兩持衾裯杖屨冬日妍燠黃葉布地客行望見山北口立石髡然如浮屠氏腰隆起若世之遊方僧自襍被者客輒然而笑時落日正射東南山山氣盡紫鳥相呼如歸人入宿石梁石梁拔起



地上如大梯倚屋檐端下入空洞中可容千人地上石脚空嵌類腐木根檐端有小樹長尺許倒掛絕壁上葉着正紅始見謂是躑躅花絕可愛梁下有寺寺僧具煮茶醅酒客至俱醉月已沒白雲西來如流水風吹橡標隨瓦上轉射岩下小屋從甕中出擊地上積葉鏗鏘宛轉殆非世間金石音燈下相顧蒼然無語夜將半設兩榻對卧子約沾醉比曉猶呼其門生不知岩下宿也

遊靈峰洞記

自石梁南出五百步折而西行過謝公嶺嶺東居人多謝姓故名或曰地舊屬臨海郡謝靈運爲臨海開山適至此人因以名之既渡緣澗南石路欲登觀羅漢洞于

篁竹窺見水西大石壁下有谷若監橐子約曰謔此或一竒也不可失呼家僮扶過澗入谷中見谷口石嶄然下垂如懸戶卷然中抱如壞壁坐其下而嘯如語甕盎中居頃有人語聲漸近則吾家弟思誠子攜與諸生也因皆屏從者從洞下入寺未至見道傍有石潭方丈而深莫可測仰視潭南上有山孤起如偃芝北上有山離立平地上如駢笋稍入始見兩大石相倚如合掌入天數千丈從合掌根入兩傍植石欄直上千步乃至掌中望見山罅中青天如懸一片水旁設大士一羅漢十八設應真像懸崖上五百然皆爲人緣取持去空遺土生如燕巢栖崖上岩罅泉水下滴唧唧如秋雨鳴屋檐間

令人大呼呼聲繞洞中不即出息墜半未至於地爲聲
所軋則飄吹衣冠草木盡濕家僮戲馳石闌中脚頓道
上石淵淵作鼓聲既下出家僮守蠹者私自更守竊登
之顧見主者皆已下即擊羅漢繩床傍小鍾鍾聲奔谷
中如鸞鳳行鳴半天上倚杖聽不可去憶吾兒時從先
君子來列胡牀坐客洞陰令侍者先登雜吹笙簫擊懸
鍾衆音縹緲鏗鏗飄飄客新從他縣來或駭愕不敢上
因大笑以爲樂俛仰淒然久之凡山寺僧皆爲美名擬
之若龍犀麒麟蓮花芝草之屬皆不錄錄尤勝者谷中
恒有雲氣是日又欲雨山水黯然戶牖黝里日吁守橐
者持橐中筆硯就屋上亭修遊事所舍亭曰看不足蓋

取昔人山前向見白頭翁自道此山看不足者詩云

暮入靈岩記

出靈峰院偶坐澗水南客有言雁山信多竒然豈復有
過于此者予爲言山之峭刻瑰詭莫若靈峰雄壯渾龐
莫若靈岩峯言銳岩言大也余適小疲倚大樹坐甚恬
客聞靈岩急欲往即起促不得休前是一日行五里輒
止舍是日會已暮頃刻馳十里到寺天正曛黑及階舉
頭見巨石孤立如人俯月出正懸東南角星象纍纍下
垂四傍客脅息不可上如游魚噏喁以身爲浮游在瀨
氣上也入坐佛宮南階上正視其面進升堂倚石夾室
則旁睨其脇夜分又數數開南牖視之月欲墮未墮夜

色如霜雪諸峰相向立儼然三四元翁衣冠而偶語獨西南一柱白而長身者也明日粥後由昌上人房下過澗得小石嶺可五六百步上觀所謂龍鼻水山半橫石作鱗甲狀陷入石中獨見其脊從西南石峽中繞出數十丈勢盡乃垂入谷中作懸鼻疑是石髓積歲月化爲石故獨此鼻如瓢大乃紺碧膩滑异他石鼻端泉時時一下滴谷石澗西有立石長三十丈如卓筆曰卓筆峰峰傍流泉墮入澗中亦三十丈曰小龍湫稍西飛泉湧出石罅直上指尺許曰劍鋒泉寺以岩名岩又以佛宮北大石障獨高且大絕頂正平如塗丹堊是爲千霞障諸峰皆率聯在障傍其大石如樹旗居障左臂曰展旗

其大柱居障右臂曰天柱龍鼻水又在障右脇間小龍湫卓筆峰劍鋒泉當居脇中

靈岩二竒記

僧言山有二竒其一由障左臂架棧道至旗半有石穴下窺穴中別有平土類人間土田一一具溝塍畎澮以小石下擊如轉鳴甕中其一由障右脇旁令人百計牽挽上懸崖上有石室室南有小徑沿徑兩旁皆麥門冬草如人手植路平熟數里若日有人來往者絕端有窟石窟中泉冬煖如湯僧乃言昔有羅漢常浴是泉故石上有平偃迹石室則其愒息地也予與客相顧竊笑惡其言涉于怪然猶記之他日身至其地可一一推而知

也豈真有隱者居之如木客之類乎英宗時有居人行
湫水上見老父手弄藥一丸大如橡栗語之曰爾爲我
持此獻天子忽復不見諸郡言狀郡驛上之天子遣中
使持香來於是雁山名始在天下老父豈董五經之徒
能先知云

訪欽禪師過馬鞍嶺記

夜宿天柱下寺水英二上人來坐與之語不悖其師者
也頗能言欽禪師修浮屠氏之法居退讓之節知止足
之義予久不見欽因二人者謝之兩客怪而問焉子平
生名不喜其法而竊私其人胡謂也余謂客今衆子百
家皆不能抗仲尼氏之道而異端獨遺其二焉曰佛與

老而已矣爲佛之說又有二焉曰大乘小乘猶言道
也或爲其大者或爲其小者凡爲果報禍福輒轉之說
皆其道之所謂小者爲其大者固已訛笑之所謂爲其
大者曰吾將以求吾心也吾將以見吾性也然怕過於
中而弗趨於常泥於體而不適於用視儒者之有父子
君臣夫婦昆弟也輒訛而昇之然其處斯世也非儒之
力則不能一息居也其訛而卑我者又其徒之不能盡
其師之道者也彼有能盡其師之道常賴吾之有君臣
父子夫婦昆弟也則不爲強者之所暴貪者之所攘然
後去之窮山大谷取其人之枯槁顛預不適於用而爲
世之所棄者以爲之徒而教以其師之說舍茲而不以

宮衣麻而不以絲食麥與菽而無以膏酪魚牲其言曰
修吾法者其爲宮室土田衣服膏酪無以異於人是自
咸其心也故其有宮室土田膏酪則其徒之不肖悖其
師之意假爲禍福之說以勸愚民也今使周公孔子之
居是也亦將修其禮樂政教以扶樹君臣父子夫婦之
道而已彼枯槁顛顛不適于用爲世之弃去之窮山大
谷以修其師之道則亦莫之制也今名爲浮屠氏廢其
法不用然而爲儒者不能盡其道則亦何以異於人而
欽獨善守其師之法而又能自爲其道之大者亦可尚
矣於是容咸願一見其爲人去從院南登小山復折入
西南過小溪百步許至柏菴問欽適往延恩院未歸有

一僮居戶下遂南去谷口與持橐者會南過馬鞍嶺借
宿山人家山人姓金氏

大龍湫記

大德七年秋八月予嘗從老菴生來觀大龍湫苦雨積
日夜是日大風起西北始見日出湫水方大入谷未到
五里餘聞大聲轉出谷中從者心掉望見西北立石作
人俯勢又如大楹行過二百步乃見更作兩股相倚立
更進百數步又如樹大屏風而其顛銜銜猶蟹兩螯時
一動搖行者兀兀不可入轉緣南山趾稍北回視如樹
圭又折而入東崦則仰見大水從天上墮地不掛着四
壁或盤桓久不下忽迸落如雷霆岩趾有諾詎那菴

相去五六步山風橫射水飛着人又入菴避餘沫迸入屋猶如暴雨至水下擣大潭轟然萬人鼓也人相持語但見口張不聞作聲則相顧大笑先生曰壯哉吾行天下未見如此瀑布也是後予一歲或一至至常以九月十月則皆水縮不能如向所見今年冬又大旱客入到菴外石砭上漸聞有水聲乃緣石砭下出亂石間始見瀑布垂勃勃如蒼烟乍小乍大鳴漸壯急水落潭上窪石石被激射反紅如丹砂石間無秋毫土氣產木宜瘠黑及碧滑如翠羽鳧毛潭中有斑魚廿餘頭聞轉石聲洋洋遠去間暇回緩如辟世士然家僮方置大瓶石旁仰接瀑水水忽舞向人又益壯一倍不可復得瓶乃解

衣脫帽着石上相持扼掣欲爭取之因大呼笑西南石壁上黃猿數十聞聲皆自驚擾挽崖端偃木壑連下窺人而啼縱觀久之行出瑞鹿院前日已入蒼林積葉前行人迷不得路獨見明月宛宛如故人老先生謂南山公也

宿能仁寺東菴記

雁山西南一峰絕高下視衆大山猶當是大父行舟行南海月餘望見直西北有物如高髻亂髮纒一握大倚為指南又其上常有雲氣居人不呼某山而呼曰常雲傍出二里有能仁院院亦名常雲予與客從大龍湫出欲宿院中度已夜遂從山人家宿運明浩上人聞吾嘗

至山中來近舍東菴菴行公營以老歿今三年其徒
義上人秀上人居之設粥茗酒醴且止予宿日正亭午
猶可去忻然許之遂弛擔焉是行也察于為佛者得三
人焉欽能盡其道者也秀與義能不悖其師之道者也

遊惠上人開西谷記

靈峰去靈岩十里而近中路有亭名翠微旁傍夾樹兩
垣路從垣間出過澗行繞北山麓折而南南有深谷梁
石過之復折而西入谷中始見石林如犬牙岩下佛寺
曰淨明過兵焚其廬獨遺壞屋數楹殘僧喜閉門而不
迎客往往過者不復知有寺予方欲遊而不得其間且
日至自常雲將入門僧拒戶不聽客入即呼溪南居媪

隔戶語僧云是遊山人乃拔去拒門木入弛擔為午炊
吾兒及諸生疲極皆小偃休陳甥腹痛自煮藥家僮炊
未熟予將子約出南戶徘徊往來望屋上山山圍屋女
城府或纍纍然如蜂脾綴下而列其中淫淫然如燕巢
斜胃而剖其戶顛者衆者仰者歛者幕者訛者偃者喙
者掉者俛而窺者騰而上者如人皆具耳目口鼻而無
一相似意此中當有大佳處耳更着屐從屋窗中出上
屋上山行二十步復得石橋過澗去子約持杖擊草又
得石垣數方皆古人作亭遺址壇為階二三級或五六
級垣相距雖皆四五步每一垣上輒見山如人腹脇背
尻向背一一不同復益上數步遂中尋見石階八九轉

一轉皆六七級西傍夾大石壁如寸巷中仰頭見青天如曲池中綠水止而不波泉滴兩崖間如雪消作水建甌下注谷中大石上忽憶先子言淨明維摩石室旁有西谷是惠上人所開絕佳當是此地耳今寺僧乃畏人知更作屋回相遮以故從窗中出不爾不見此奇特書之庶無為僧所欺惠字柳下工為五言詩云

雁名山記

客問山以雁名胡謂也予為言長老相傳絕頂上有天湖冬春雁過入南海常棲止其中居人以為名湖水隔入澗流谷口為大龍湫湖傍有比丘尼塔寺一夕沉湖中至今五百餘歲然猶遺餘地敗址棠梨花數十百株

皆儼然成行列土絕膏肥種蹲鴟大如斗長老又言湖水漸涸為葑田歲月浸久彼湖皆化為腴土十年前有僧來乞食因言吾去前年去雁湖傍依大樹縛屋種菜蕺菜蹲鴟以為餽糧獨無所栖願乞金錢作屋予欣然止其宿問道路何從入僧具言去從靈雲寺南入山時時過絕險挽牽懸藤偃木以過日初出時上山正中僅可到山顛望見永嘉城下大江如牽一線白東面海氣蒼蒼如夜色山上無膏燭地爐中燒木葉葦竹山鼠來與人相向坐如狐狸大無屋不可居也予愛其言久欲登之度持二日糧乃足又向乞食僧已云無復茆舍釜竈膏具當用肉糲糗麩雜器之屬小果往五六年嘗

一至靈雲寺觀所從入路因往至雨潭潭上瀑水懸空數十丈谷中風起水吹着人常濛濛如四五月間霧雨亦一奇也旁有隣寺三四區曰古塔寶冠羅漢石門又有一寺在南山冢與常雲相望路絕高曰飛泉種種自作面勢皆可遊獨不大爾

秋遊雁蕩記

北從天台來入古東甌郡境上望見西南有山相向立如兩浮屠遊者咸曰此雁山門戶也益深入其阻視羅漢洞東西天柱大龍湫猶人有眉目十八寺皆其肺腑也僧言其祖自開雁山爲諾詎羅去遊方時師懸語之曰若行四方當值勝妙山水起塔立寺花名村鳥名山

則其地也詎羅適行至山下問田間老父父所居云何父曰芙蓉村又問山云何曰雁山詎羅曰是吾師所語我者吾於此乎老矣入過四十九盤結屋谷底面湫水以居既沒其徒弟子爲立塔廟是十八寺之萌芽也詎羅首所開止得其肺腑今人言春遊天台秋遊雁蕩此非言地勢便利其時獨可遊耳雁山無土田桑棗兩山東澗水人行盡日曲折在水中又多篔竹草長沒人春夏十日九霧雨後行人不見前行人時時遙相語又馬蜚毒物善噬人緣木葉草未風動即着人出血數升獨秋冬時草木黃落毒虫盡去乃可入徑數百里山皆在目中無秋毫蔽遮然患遊者匆匆一住地恒遠在深谷

中不盡見也古人云緊絆芒鞋行。月彷彿見得皮膚
耳非過言也呂夷簡焦伯強劉器之王道齡皆嘗為大
官而能留連山谷中盡發其勝豈古人用此為陶寫地
耶然名為遊者衆矣壁間姓名一一為狐狸貓貉嚼盡
獨此三四人者至今凜然有生氣何耶其草多寒涼藥
可用治疽瘍滯下其木多杉檜豫章其獸多猴狙豕而
無虎其虫無蚋蚊而有馬蜞蜩善噬人以燒竹葉塗創
血立止其居人不為稼穡皆取給衣食於僧云

李五峰集

元 李孝光 著

古樂府四十五首

長干行

秋風從西來吹我庭前樹聞歡在揚州却向姑蘇去估
客離長安教儂寄書處

妾薄命

妾薄命當告誰身年二八為嬌兒阿婆歲歲不嫁女二
十三十顏色衰天公兩手搏日月下燭萬物無偏私奈
何醜女得好匹一生长在黃金閨美人如花不嫁人父
母既沒諸孤痴寄書東家小姑道与妹莫擇夫婿好他

入好惡那得知失時不嫁令人老

一車南

一車南一車北山川悠遠無消息野風吹草朝日黃羈
旅獨憎締綵涼男兒生身高七尺何可相思損顏色西
市日日買鯉魚魚中會有而寄書

吳趨曲

四座並清聽有客歌狹邪狹邪不可聽聽我為爾歌吳
趨美人珠被貂諸于美人寶釵有九雛美人投我明月
珠

采蓮曲

采蓮江之南采蓮江之北采蓮何所有但采蓮中葍蚤

聞離別苦當爾不願從前作相識縱令別離不復相憶

雲之蒸

雲之蒸如鼎舖天地塊北方有茹者吐陰陽糅方作雨
萬物膏澤兮功其惟汝

溪之水兮幽幽下如橐兮中有蛟與虬人涉兮印否我
操其具以楫以舟

五日一風十日雨涼着稻花香着土秋風穰稷黃粘天
千家萬家狂欲舞溪頭大笑語向人溪南出雲溪北雨

蓮葉何田田

蓮葉何田田宛在水央別離不足念亦復可伶生

蓮葉何田田見葉不見水貧賤貧賤交富貴富貴友

花生滿洲渚不復葉田田持身許人易將心許人難

采蓮曲

采蓮復采蓮蓮生隔江水不愁無舟楫但愁波浪起
采蓮復采蓮水深不得歸兒饑須毋哺當令阿誰飴

送且迎

曙月踈星天欲明馬鳴蕭蕭予且行行雖不遠思汝
重是兄弟難為情星如撒沙天欲暝稚子候門人汲井
還車在郊子復返簷隙持燈笑相領

江橋樹

江橋樹荏苒年華暮迎得行人歸送得行人去落葉成
秋風行人在何處

二

江橋樹日日斜陽暮春風吹落花半隨流水去花落有
盡時水流無盡處

羽林曲

公子遺我白纓裘公子遺我明月珠孤兒假父云姓
其官高于五諸侯公子之恩明日酬

白翎雀

黃金鑄作鍾子期絲絲繡作平原君平原能拔天下之
奇士子期能識天下之音心丈夫生逢如此二賢者有
身豈復愁沉淪富貴不用自摧謝困厄不怨為窮人在
昔帝堯大舜為臣元凱並舉馭鳳鸞周公勤勞握髮

吐哺身致多士爲王強輔赤帝之子有士如雲相何肺
腑爲漢舉信挿置羽翮拂摩龍鱗我歌曰翎雀子起爲
我舞人生不滿百一絕如飄雨戶下有凍酒席上有懸
脯賓客共飲此聽我歌中語君年未五十遭逢大聖人
聖人之德如流泉先後輔扶皆英賢大開明堂布萬化
垂衣拱手仁如天時雍詎异堯舜日持盈遠過成周年
汝于此時守東壁討論文字在上前何敢更較官大小
小星帝留衛帝垣嗟我行年五十六此豈有意凡骨仙
但令公等皆盡忠我惟歌咏酬豐年今者別離何不樂
且飲莫問月未落官職況在天祿閣嗚呼國士之恩何
日醉爲爾重歌白翎雀爲爾重歌白翎雀

隴頭水

隴頭水嗚咽嗚行人聽斷腸聲隴頭水嗚咽行人淚
眼中血月薄塞雷低行人到此心傷悲世間萬水東流
去隴水分流獨向西

效玉臺體

夜夜曲

黃雀不離棘鴻飛不離雲可憐天上月夜夜照見君

携手曲

携手復携手送出建業城男兒不在家又作萬里行

悲寒風

夜漫漫風凜凜嚴霜下寒更甚孤鳴鬼啣有今夕倉卒

劍戟生高枕神光隨地推白虹嗚咽英雄淚空飲

桐江

朝取鱸與鮓暮取魴與鯉賦民無令困革盡毛安處我
欲言之大將軍家將軍不見省奈何減民田租將軍出
乘大馬出乘高車

南山有鳥

南山有鳥名白鷗乃與凡鳥懸十塵樊籠既不能繫
粟又不能馴好風東方來吹上天之門渴飲玉山之玉
酒饑食玄圃之瑤草鳴聲和樂羽毛鮮好天上鳳凰與
之偕老

成相歌

天不遠兒籲天哀哉父母兒弃捐死而無怨阿兒泪滴
到黃泉天甚高聞兒號兒心慊慊一何勞謂予不信葭
則有葦茨則橐橐

書窈窕圖後

余觀宋玉曹子建洛神諸賦其詞若近于嫚褻而世咸
以為誠有是事殆不然也自國風雅頌之亡也一變而
為離騷然其比興之法則未嘗亡蓋詩之善善惡惡也
其美是人則形容其德之盛如曷不肅雍王姬之車之
類是也其譏刺是人則誇張其服飾之美顏色之麗如
胡然而天胡然而帝之類是也夫其所以愛惡之意固
以躍然于言外如屈原之湘君夫人、士之美人曹子

建之洛神亦皆為是假設之詞以是發泄其憂怨悲憤之情蓋比興之遺音也今觀劉君弘度所貌窈窕圖又讀其所為歌詩而識其意明屈宋之作為庶幾正大之情而非徒為是淫亂之辭其言忠厚合于予心故歌以繫之其辭曰

神曄曄兮來下翹翠旌翩其如舞嗟夫君兮懷女風
淒兮無感我尸神將舉兮委蛇捫予心兮嘯歌不我思
兮奈何循吾理兮靡他行無留兮媿媿巫維子之宮兮
安女栖胡獨受命兮不齊吁嗟蟠螭兮朝齊

題跋上所藏蘭蕙圖

嗟孫之生兮亦在中林竊獨不顧兮惡木之陰夫霜露

之慘慘兮而予悒悒昔逢君之不見察兮恐孺子之不
任苟返予乎中路兮尚當君之心喑有瑤其佩兮又何
遠於子之襟

所思

君乘馬兮予追于丘君乘舟兮予涉于洲遠而不見兮
涉江與淮豈無人兮望予之所思鴻鵠高飛兮孰知
志道之方行兮我又焉求

怡雲

山有雲兮為雨滂沱山有雲兮媚江維河山中之人兮
和樂而有儀予心休休兮媚予匪他而有客兮于予晤
歌

再賦怡雲詩

予既為魯君倫文作怡雲之詩與之別六年而復以
示予則或有為是詩作序者于是更作詩貽之永嘉
令林清源見予詩又為易置改定前序之詞而題其
後曰容成之山魯君倫甫隱君子也孝友于家泊然
無求于外者也扁所居室曰怡雲怡取陶弘景
以見志也夫人也非淡于世味而自得于中者不足
以喻斯言也

至正三年正月九日復寫此詩而志清源之辭云
雲予怡乎我以為飴予雲飴乎雲曾不知予朝出而雲
與出莫歸而雲與歸南山不爛兮長與雲期

黃民尚所藏王若水陶令歸來圖

連山兮雲中綠樹兮重重行人兮始歸佇立兮秋風鄉
予息兮柳下治田兮墻東誰令去此兮幾失予躬諒非
予之不知兮逢彼之窮嗚呼知我者西隣老翁

有車送韓從事行縣

有車兮涉遠大川當前兮漫漫吾所弗濟兮有如茲
民之方艱兮我能獨安夙夜以思兮撫髀覆顛有車兮
桑田植其兩輪兮蒸我農人曰爾農兮傷我食艱曰予
天子之吏兮來綏爾民尚猶有寃兮及爾話言民曰嘻
兮田吾力農公惠我人兮不其已多我生庶幾兮有瘳
凡百在位兮吾韓侯是倣

竹石圖

山之石兮峩峩鳴有鳳兮下來鳳無止兮予憂鳳之饑
盍歸來兮天池山有竹兮其實離離歲將晏兮誰能俟
之橫絕浮雲兮雖有矰繳焉能知

雙松圖

有鬱者髯兮而其統挺望之在澗兮其漸而山霜雪
怪怪兮受命獨全鬢而在澗兮有蒼者年孰為嗒女兮
胡不歲寒嗒金之良兮寧久汝捐棟則隆兮尚終异夫
茅與荃

蓮花障

池水有蒲兮君子有酒曰予有政兮庶也無悔池有荷

花兮其下維魚曰政其舉兮匪予室家有政者鷓兮有
振者鷺君子燕喜兮生民之休大冠綉裳兮君子有光
眉壽而和樂兮俾民弗忘民之弗忘兮維德之長

福源精舍

彩舟兮煥煥風將起兮無岸渚花兮白紅若有人兮爲
粲相我樂兮未殫時幾何兮日旰極浦兮水深下有
龍吟洞簫作兮波浪湧送將歸兮于南諒佳人兮未遠
令我思兮何心颼風兮吹人層波兮粼粼掇芳州兮寄
遠與我期兮陽春

淦水

淦水兮滔滔其坎兮有蛟謂予兮無濟遂濟兮無匏使

予心兮悒悒

擇木

孔子居衛嘆曰鳥能擇木木豈能擇鳥予將去楚而適吳越竊有感于斯言作擇木詩

提提兮飛鳥翔而集兮于木場有委粟兮而予之不欲樊則有棘兮非予之樂驚則不仁兮曾莫予毒提提兮飛鳥又集于陵毋隨于繒豈不知兮有命嗟今之人兮不仁

瓶有粟

友人張子約名其齋曰顏樂予見而許之則曰吾姑以自名吾烏知所謂顏子淵彼固不自知而孔子知

之吾又烏知吾之樂凡吾所自名亦待夫吾知者爾予于是為之作瓶有粟

瓶有粟兮孰知予瘦居有官兮孰知予陋御冬有褐兮又烏用夫文繡人于哀兮予不知入事父與母兮出從仲尼謂蠪蛸兮無胃我戶吾獻歌兮其下

沂有梁

沂有梁兮維鯉維魴沂之西厓兮有棗樹桑居沂之人兮寬裕而善良古之人兮翱翔于之歸老兮沂之南陽

箕山為許生作

箕之陽兮其木颺颺箕之家兮白幽幽夫世之人兮孰

能遺我以憂雖欲從子兮其路無由朝有人兮來飲其
牛

東平彥明

我所思兮南麓之陽往欲之兮川無梁乃心向往兮弗
忘縱不見兮何傷其一

我所思兮南麓之下欲往從之兮無馬撫予心兮獨
仰而太息兮不可以寫風冷冷兮吹女其二

雲之陽送人之兄代之

雲之陽雁成行我不如羣翔翔伯兮裹橐與其囊曰將
去此兮浮海之航我有兄弟同我父母豈不念父如足
之與手願而富貴歸故鄉阿弟兮策馬來相取

雲之飛成行雁我不如鳴相喚雞鳴戒行裹其飴曰將
去此兮 勤之澗嗟哉仕宦豈不有寵榮欲將兄弟離
居難爲情願而富貴早歸來阿弟驅車來相迎

行則有車送李德章侍尊父入京師

行則有車兮涉則有船人則兄弟兮不如我之同姓予
好仁兮樂子之仁子而在兮尚予有鄰

舟則在川兮車則在阪人則兄弟兮不如我之同本我
思古人兮鼎耳而玉鉉思而不見兮終幾無愆孰輔予
仁兮孰謂仁遠

李五峰集

元 李孝光著

四言 九首

有翼

美郡監也郡使吏作哨船備不虞也為作有翼
之詩以美之

有翼大艦如山之宗輕利攻突視彼艤衝司其操縱為
萬夫雄

中建重室守以貌虎其止如林其涉如舞孰敢當之矛
戟鉦鼓

鉦鼓淵淵其旗旆旆風揚其游如雲斯營波濤不驚鯨

鯢况潰

有跋于海或抗于濤舟師理杞軍旅樹蠹執獲窮寇率
剪其曹

還泊于沙雨潦浸淫物久則腐或漏或沉是名武備矧
公實臨

維仁侯公施惠布令使吏更作毋為民病命我岳守
其有政

岳守謂民公寔仁女官為亟作于民無取有翼斯艦維
國之武

我武孔張皇威暢遠盜賊消沮改惡慕善海若安流陽
侯有衍

大哉皇仁武備弗忘鷁彩漾影蛟文流光君子為政恒
慎豫防

河流

為陰君錫作

河流洋洋維鯉維魴君子有母君子之光
鳥飛提提子則哺之君子有母何以事之
南山有雲淒其以雨我則有母莫在膝下
豈無好爵我不敢私毋寒毋燠歸視母宜
席何鄉矣又何趾矣其何羞矣命我婦子
我遊四方婦子甚敬雖有婦子不如我仁
嗟予有子事我甚善女則有子事女無愆

岐山

岐山小隱圖揚善卿追圖其先人所居之里宅也善卿獨事母夫人宦游江南將二十年歸而未得因作是圖以示不忘其先人第宅丘墓之故其意亦可悲矣他日予往至善卿所見是圖于壁間予爲之撫然而又以知善卿之仁也作岐山之詩以慰之嗟乎以善卿之善事其母奚必岐之宅而後爲養哉孝子之心亦曰如是而後盡焉耳

我思岐山無日不思彼岐出雲亦返於岐
思胡不歸孰言岐遠舟則在川車則在陌

維岐之陽有棗有桑予歸不遑予心之傷

原田

樂成溫屬縣也爲鄉六其田土錯海中軒輶如犬牙獨山門直縣北其他多高山深溪土敞而瘠居人無所稼穡五代間有丁公者始教民治田起大防其爲式沉竹籠水中捷以巨石墜以棲苴目地勢罄折行水稍溝以灌溉水勢所至盡可耕種自丁公時爲埭凡三曰北閣九房丁公丁公埭在澱村其民曰我不知治田丁公寔教我目名其埭曰丁公使我子孫世世無忘丁公也澱村之民愚蠢而醇厚視諸爲農者又

最勞苦縱無年不甚困鄉之富者竊睨而垂涎
欲陰壞其利而攘之而持布泉啗惡人去丁公
三百步更起埭奪水民訟諸有司吏畏富人
不即受民則泣守枯田悒悒不能言泰定二年秋
會縣尹靳公來止富人素畏威名乃自令惡人
壞埭他日又輒啖惡人致詞小人乃喜激村民
咸自相語曰公且去富人取吾屬矣公惠我等
甚大願相從留公以續吾命即不願當臥塞其
門無聽公去李孝光聞其言而悲之爲之歌以
達其辭

我田維何于彼高原曰有知者淫水兩山

有渠閣閣丁公所作爰稼爰穡援手于經
我渠既成我稼既同歲則大有化爲沃壤
飲食世世丁公之績富人睨傍陰作蠹賊
嗟彼富人胡俾我壞天生靳公小人所畏
我不有命汝則奪之孰我父母靳公活之
嗟嗟小人君子所怒公在如鼠公去如虎
爾操其翰我繫其駒有能還公則脫我牛

歸來

有悖孺子衣之狐裘匪子之病予以爲仇既撰予杖升
望于丘江不可涉夕共予舟

有樊

有樊有樊樹子以孫胡不蕭艾蕭艾寔絲彼樊胡治刈
而爲芻嗟人有邑曾不是圖匪子孫之病子聞有命

東山

雲出于山不見雲還我不如雲我巢其間譬彼援溺操
其具以行奈何蒼生奈何乎蒼生

東里

葛之漫漫母敗我垣河水之漬母嚙我稻田子甚勞苦
彼黔不知子將遂歸其畜其蓄東里之老聞子言而嬉
子曰歸哉

鄭氏義門詩

南有嘉樹鳳鳥所巢君子之孝君子是傲予何傲矣有

踐者禮匪予能孝自予祖禰先祖相宅猶泉之原豈不
貽世而俟其綿擊鼓之堂兄弟雁行衍衍栗栗執德孔
明伯也甚敬衣冠燕處叔也絃歌陳其豆俎有鬣而禾
錦紳佩蒞數視諸父視其舉趾匪夫之良有姒有娣瑟
彼中饋饋饌酒醴設哉話言自我諸昆羣弟具聽有路
其敬毋徇毋怠毋酗毋淫毋聽嬖言毋謹我庭嗟嗟話
言胡獨爾行凡人有家用爾爲訓尚願子孫終永無忒
作嘉樹歌以勗明德

李五峰集

元 李孝光

著

六言 四首

江邊

江邊古樹猶碧天際白雲自流七十二灘浩蕩夕陽照
見孤舟

題鶯轉上林圖

臺榭東風婉婉池塘綠樹陰陰有箇黃鸝飛入一鷺衆
鳥皆瘖

雪晴

雪乾玉餘初香月 艾朱二首 八開門 九 懼仙白雀橫

江清曉

池上李花

天寒古雪逾碧月落行雲未歸孤雀橫秋清曉仙翁顛
倒棠衣

李五峰集

元 李孝光 著

五言排律七首

山陰縣學文會用杜詩分韻予得春字

淮南樹北縣為政屬賢人黌舍陳邊豆初筵生縉紳酬
賓更盟爵敬老有重衲相見修容盛還驚禮教新湛露
沾清夜泮水照芳春但願崇明德盟雞庶有隣

王都事仲能書巢

頻過三槐宅湖水帶堦除儲書向籀閣為知類轆車戶
牖網繆后標枝偃伏初大牡除風雨文字起魚龍有虞
謝岩穴遷史羨蕭居無煩厭儉樸堪容萬卷書

陪薩使君飲酒鉄塔寺分題得擇龍軒分韻得而
字

琅玕盡靈種玉立近東池已與風雲會終含冰電姿氣
酣猶曩負鱗動覺之而雨暗思雷澤天清入葛陂鳳毛
當戶見蛇影到林疑神物煩呵護應看變化時

去病秘丞趙君涼國公子也

四世三公重承恩自主知清官守圖籍華首近思論英
聚懸軍後班衣致養時更聞紫霄願兼領白雲司玉節
光先趙金閨步不遲世知麟趾貴人喜鳳毛垂嵩岳生
祥瑞朝廷樹羽儀于門種陰德庭下見佳兒

竺雲為曇山人作

陰何聽

雲來自西極駘蕩復委蛇影度流沙曉峰臨鷲嶺竒從
龍飄婉轉觸石起參差光擬鳳毛紫清同玉葉垂芙蓉
連華岳綺縠映天池五色生祥瑞賢人懷羽儀

玄冬館飲酒分韻得衝字

良朋謝悄悒仙賞屬玄冬野潤梅將發山乾雪不封生
夷近芳節出日媚川容愁用詩瀟沆寒憑酒折衝幽人
每多集俗子自無悰聊以供娛悅詎知縻萬鍾

李子雲白雲圖

白雲如白月宛宛復離離青霓依澗出玉葉映簷垂詎
闕飛花度還同病宦窺分輝舍戶牖倒影散園池近看
吁欲落佇立意俱遲坐臥常相對成峰晚更竒

李五峰集

元 李孝光 著

七言絕句 二百十九首

簫臺八景

雲門福地

古帝南巡事已非
土階茅屋尚依依
夜深月底吹簫去
度得雲門一曲歸

蓋竹洞天

蝙蝠翻雲似白鴉
石林玉氣亂晴霞
山中雞犬應相笑
溪上紅桃幾樹花

雙瀑飛泉

雨洗天根雲洞幽黑蛟飛電舞長湫只應壯士思酣戰
組練相銜夜不收

蕭臺明月

山月崢嶸露玦環石樓香冷白雲間玉簫吹裂階前竹
騎雀仙人去不還

白雀晨鍾

風約踈鍾下窈冥天南曙月颭飛星駟鳴闐闐囂聲起
老雀巢深夢未醒

紫芝晚磬

蕭蕭清磬出雲遲月死空林日氣微重過紫芝山下路
壞橋燈火照人衣橋一作垣

東塔雲烟

海月四更移塔去天風萬里劈松開烟鎖日出無人到
獨自看雲山上来

西峯松雪

山上行人如凍繩西崖日出淡青熒太陰積雪草木縮
留得孤松長茯苓

雞啼

堯舜文章如混沌臯夔禮樂鑿崆峒雞鳴天地如夢醒
日出扶桑照海紅

白髮

半夜雞鳴非惡聲攬衣起舞若為情髮邊白髮三千丈

總為憂君憂國生

六月初十日雨止月出生大桂樹旁西風先秋
軟玉衣裳翡翠環暖笙初學鳳綿蠻廣寒宮闕西風緊
一夜天香滿世間

得故人書

風前一紙故人書上說相思下起居却道梅溪新事業
聲名全勝紹興初

題牧牛圖 郭經歷所藏

牛下平生笠與蓑月明奈此北風何阿童吹笛無人問
中有南山夜半歌

春風

春風隨處作春晴楊柳依依綠未成昨夜池塘新雨足
蛙聲剛亂讀書聲

石門觀瀑

神龍捲海上青天萬斛明珠亂後前天下蒼生望膏澤
試將霖雨作豐年

過釣臺

赤龍已挾故人飛卻愛清江理釣絲入覲匆匆謀去就
當時猶悔見机遲

農事

落日蜻蜓處處飛槿花門巷豆花籬行逢野老問農事
稻雨濕衣香未知

八香寫源 仲

萬斛天香夜
才暖風涼月釀清秋詩人試與評花品
定是人間第一流

送李仲羽歸江東回寄伯循御史

江中八月雨如烟去買徐州送客船
采石山頭送李白身騎明月上青天

二

使者新從南海歸囊無意敢獻慈幃
自聞徼外開龍節頗憶江頭把錦衣

三

扁舟便擬下姑孰恰值先生不在家
杖策過從王御史

城南寺裡看黃花

春風狂甚漫成

為語春風莫太顛請函封事上皇天
密轉洪鈞生衆物莫吹急雪壞豐年

次朱希顏韻

士當未用思見用不見南山夜半歌
踈跋黃塵赤日下翻思幽谷弄春蘿

送周良臣上湖州幕兼寄希顏

日晏黃堂報起衙綠溪騎馬看桃花
莫翻墨汁塗春水篆隸成文散碧紗
隸一作摺

二

建業水惡不可飲
瓢泉最美憶湖州
亦欲回君乘舴艋
故人止住雲溪頭

正月戊子夜大雨

偏方未覺春寒盡
驟暖先疑雨氣生
一夜東風弄雷電
攬衣起坐數三更

二

昨夜水淺淮兒浴
今日兼行萬斛舟
人生有時會稱意
請看秦淮新水流

送蔡飛卿之維揚

眼底閱人如過雨
傳來家法祇論心
老翁曾對明光殿
大笑時聞趣賜金

二

送君直渡秦淮水
風急桃花飛過江
自有行人回首處
昇州山色滿船窓

題聚乘圖

收拾蘭蓀弄棘鍼
銅瓶活水注深深
國香不與凡花並
要見平生國士心

宿緱山侯氏宅

海東月明九萬里
照見山頭白雀還
竹几匡牀清似雪
不知門外是緱山

贈靈岩秀禪師

北林日午煖如烘
盡日溪行曲折中
自愛敲冰看魚上

山頭樹影落溪紅

二

密室都無霜露氣壁間看此一枝筇平霞龕底論文酒
未信闍黎飯後鐘

時思菴通求頌一源

家住雁峰南復南碧寥飛雪下晴潭曹溪一滴無多子
要向源頭活處參

通之弟成求雪屋頌

倒挽天河轉翠微玉虬鱗甲滿天飛道人結屋東溟住
愛看晴花不掩扉

偶書所感

鍾鼎山林易地難丈夫出處正相關綉鞍大馬都門道
却憶西樓看碧山

擬西軒栽竹

寬築牆圍小築園多栽修竹倚晴軒我無一點客心事
養取清高遺子孫

清明日郊行

清明處處夢風斜詩老得閒長在家遠樹小村千瓦雪
不知落日上梨花

寄張顏樂

燈前秋雨白沉沉慎莫思家恐損心夫子宫南木樨樹
有誰沽酒喚君吟

洗竹佩小刀

鱗甲青熒紫燄低猶能夜夜吐紅霓自從洗出雌雄劍
橋下蒼龍不敢啼

白菊 予讀古人咏白菊詩不愜予意繼作二首

香無邪氣素無緇傲殺清霜死不衰誰遣白衣來送酒
到今魍魎遠東離

二

昨夜西風吹女寒幽香楚楚正鱗鱗平生屈叟嫌儂醉
不放衣裳染麴塵

贈胡仲賓

九月風多短褐單劍光抱月忽飛還人言華頂峰前路

正在白雲飛處山

十月羣飲茅屋

茅茨十月煖如烘熨破枝南凍蠟紅政恐無人共料理
却將詩句惱天翁

題憲使丁手卷其一琴篴圖

七尺孤桐十萬師清風凜凜洗瘡痍詞高調古無人識
惟有千年老雀知

其二四知圖

人間私語如雷動暮夜如何可受金政坐當年輕取友
故人不是不知心

微恙而臞聊自嘲

安臥書巢讀父書較量伏臘又羸餘讀書未必能成癖
伊傅諸公也太矧

望西北羣山

青處模糊白處多西山無奈白雲何詩人入細平章過
翻作岐陽石鼓歌

送輔賢出山作首尾吟二首

儒官不畏簡書催拄杖休驚石上苔行到水窮雲起處
路從四十九盤來

二

路從四十九盤來樹底看雲首獨回客裡不知身是客
向人猶愛話蕭臺

張顏樂詩集後

蚤歲蜚聲入紫庭暮年白社共傳燈香山句法無多字
可使兒童老婢聽

送人

江上晚山無數青行人草草似流萍水邊燈火江船發
五十長亭第一亭

次薩使君韻

鳥几繩床詩夢熟驚聞風雨欲翻江酒醒憶是長芦寺
半夜松聲繞北窗

二

大江北岸望南岸山色微茫似破罾石馬麒麟竟何有

南公空說晉諸侯

三

使客匆匆感歲華
杏花消息又桃花
江南佳麗春風見
柳絮樓臺十萬家

四

江氣蕭蕭如遇雨
起看北斗掛船頭
猶憶前年祿使客
臥聽茄鼓入揚州

李遵道山水便面爲董仲證題

銀河飛來掛絕壁
下有長江徹骨清
謫仙騎鯨上天去
應向山頭吹玉笙

新月

光中新見仙人跡
桂樹初生影未濃
仰望青天如止水
西頭一瓣玉芙蓉

贈潘九霞

道士自稱潘九霞
身騎黃雀大如車
借我北窗眠一夜
酒醒共啖白丹砂

九霞聽松圖

不到茅山又五年
煮茶更試碧雲泉
山中百事便靜者
惟苦松聲攪醉眠

夜夢老人身長而
我冠自稱住釣臺
僕意其爲嚴子陵
居旁者曰此朱元
晦也夢中作詩遺
之既覺猶能成誦

赤龍飛起九天開
緣底先生住釣臺
昨夜月明烟水濶
白鷗飛去又飛來

東古元端上人

竹扉花牖雨聲新一榻
清風不着塵石笋山中舊時客
幸來相就說前身

牧牛歌

錦襠觸破死生机
歲月如流未得歸
慚愧情入遠相訪
阿童惟有一牛衣

謝人送鹽

淡飯粗茶藜莧腸
父書萬卷菜根香
知君端是調羹手
遣送山人味最長

赴都監梅

一度來時一度看
白鬚人立月闌干
先生定有歸來日
要索夫君話歲寒

王貞婦廟

山下江流幸自清
山頭明月已無情
此心若愧王貞婦
莫向青楓嶺上行

寄朱希顏

江邊鴻雁下年年
客子何由兩鬢玄
七十二灘秋月白
荻花風落釣漁船

二

城中鼙鼓雨淒淒
舟子牽船上惡溪
回首意中人不見

兩邊楓樹郭公啼

懷謔使君

城上烏啼欲閉門
蕭蕭風雨又黃昏
無端画角連雲起
鉄鑄梅花也斷魂

二

二月江城未見花
笛聲嫋嫋起誰家
曲中大半傷離別
馬上無人寫琵琶

三

門前杏樹高過屋
常說花時倒一樽
不道花開君作客
暖風晴日與誰論

四

二月已過十五日
北墻梅花猶未開
今日開門花滿樹
頗憶共君啣一杯

五

月子纖纖青海頭
使君昨夜過揚州
城中高髻瓊花曲
去聽吹簫何處樓

祠宇觀登樓

先生長出訪丹砂
去入何宮道士家
不是山南即山北
款門先覓看黃花

二

鳳凰臺前看明月
姓字從此落人間
西風昨夜吹庭樹
又逐閒雲過別山

三

祠宇觀前斲茯苓偶登高閣眼為青西南到江三百里
只似案頭雙硯屏

舟過吳

十五女郎可憐生牽挽百丈踏泥行洗脚上船歌白苧
春風吹過闔廬城

二

二十四番花信老溪頭紅減綠初肥東君也是多情思
盡日扶持柳絮飛

三

寒山寺裡風雨橫柳下爭來繫客船後到官船鉦鼓急

却驅人出索人牽

懷薩使君

人到中年畏別離况逢多病轉相思夜深風雨滿高竹
自起挑燈讀寄詩

題敬仲古木

高鸞不下尚輪囷百尺龍門半死生裁製仙禽酬素賞
清風流薄夜啼聲

觀鏡芬陀室

老夫問訊芬陀室人與華芬久自薰波利城中君到不
藝香長是逐風聞

題斲江雪詩

老翁忍寒作寒語寧知願作冷秋菰今日張詩向素壁
只如悵見北風圖

辨妙明善蘇帖

學蘇未有能酷似品第空聞入妙神妙明寺裡襟花苑
百贖忽然逢一真

題山谷遺姚青帖

君看用意到履屐得似先生始識仁霽月光風柰何許
分明茂叔一流人

華山圖

山頭夢覺三十年大笑騎驢踏紫烟後世兒孫盡仙骨
斷除烟火學神仙

二

紫髯綠髮如飛仙白驢偷喫種芝田二月三月春氣盛
山頭桃花紅入天

萊上人弱水頌

豈無船筏奈君何生怕無風水自波碧海倒流三萬里
手提明月上銀河

次韻薩使君襟咏

扣門人至從題鳳寫字誰怜可博鶯獨露亭中未歸客
懶閒成癖奈詩何

二

吳妹彈箏向秋月錦鞬畏恨覓題詩東隣醜婦持門戶

不願蛾眉映鮑犀

三

烏衣更無王謝宅青山好在仲宣樓南堂明月無人管
清簾疎簾夜夜秋

四

僧學密峰開牖戶山中八月未知秋銀牀正換養花水
屋上一聲黃粟留

五

明月相窺怜我瘦幽雲不動妬僧閒病餘無力看賓客
獨露亭南數碧山

六

秋來野水亦已落行過女墻悲古苔西日正起鵬鷺起
北風頻兼鴻雁來

秋江晚渡

散髮臥看江水流蕭蕭天地一孤舟白蘋紅蓼斜陽外
短笛偏生喚客愁

陪觀志薩天錫二使君游城西光孝寺

客子知寒歸未歸北風鴻雁又南飛東家借馬看黃菊
頭白山僧開竹扉

石竹題胡元中竹石卷

山上白雲如白茅夜寒玉氣漸應高春風吹碧琅玕了
清曉西池看鳳毛

次薩郎中送蕭御史韻送薩郎中

樓上吳姬唱竹枝東風正急帟鷺飛客游先自無聊賴
况是離人作惡時

十月庚申登舟口號

北風大浪依舟楫暫出歸來詩滿篋家人急遣筍輿迎
雁山一路看紅葉

老鶯

千絲影裡一投金織得閒愁滿綠陰花外不知春已去
綿蠻猶自語芳心

歸樵晚渡

老翁住向溪西崦日暮溪南拾蕲樵喚得隣家人打渡

停舟更看碧嶠峴

次崇禧真人徐景周韻送茅山鎮長馮秦卿

與君遊久最知我借問誰能似我閒即買扁舟過淮去
舒州城上望鍾山

從開元寺怡光長老覓茶

跋跋黃塵赤日裡終慚觸熱到人家病起頗思茶破悶
願從君覓雨前芽

四月二十九日泊舟姑蘇臺下入城舍烏鵲橋南
姑蘇臺下牽船過烏鵲橋南見月生三更五更風露隨
誰家長笛故園情

希夷二

戶外春風作意顛落花如雪解漫天先生醉睡復醒睡
燕語鶯啼又一年

和薩節中韻

繩床小寐聽茶熟夢繞山風猶怒號詩來恰逢三日雪
興教寺前春水高

二

江上楊柳又青青雙槳復作鷺雀鳴中流擊楫渡江去
半夜雞鳴非惡聲

三

客子飄零歸未得但願美酒為消憂故人若問吾消息
好說周南正滯留

病起寄伯循御史

何言痛飲即吾師病覆壺觴亦屢詩客久自應甘寂寞
獨憐風雨打窗時

二

病起無聊帶減圍看花驚有未開枝主家十二樓中見
爛熳春風祇自知

題王仕讓御史所藏畫卷其一風雨回舟

天昏地黑蛟龍惡風雨如山擘不開舟中自有刺蛟手
笑殺舟師挾柁回

其二寒江獨釣

光光明月照青天青天落落江不連老翁未是尋常人

一絲能令九鼎重

其三古廟折碑

山下荒祠山下溪
繫牲斷石是誰題
落日行人更回首
青楓樹裡鷓鴣啼

送茂上人

五湖春水綠溶溶
兩岸花開開白紅
欲買扁舟隨汝去
臥聽疎雨打南蓬

二

楚雨綿綿暗五湖
稍看新水沒菰蒲
湖中恐有隱君子
借問曾逢范蠡無

三

二月狂風已不禁
天籠大野日陰陰
高齋一夜聽新雨
想見城東柳色深

灤湖之水九月流出江江水春長復入灤湖

洲渚日落雁相呼
春風過雨亂菰蒲
江水西來百餘里
一夜倒流還灤湖

病中

日夜東風相蕩磨
故應地上落紅多
更須病起能拈酒
可奈東池芍藥何

靜軒

靜中萬物見天机
祇有春風所知盡
日綠陰庭院裡
閒看科斗上盆流

送陳輔賢上柳州興寧簿

阿兒有母阿兒飴請看林鳥哺母時見說柳州好風土
江魚入饌老人宜

和戴舜臣樓字韻

子房老去願封侯度亮平生獨上樓百曲青山百曲水
詩人浩氣拍天浮

遊石梁戲嘲主人

樹底秋聲樹杪苔杖藜又過白雲堆青山縱是無情物
解笑山僧厭客來

主僧曰予豈厭客者哉求予解嘲用前韻

山頭老樹碧於苔山脚丹楓綉作堆慚愧山僧更解事

丁寧莫引俗人來

書岳法師屏

眼中有客久不見長見白雲成往還風着紙窗疑是雨
酒醒忽憶在南山

宿棗樹灣

棗樹灣西亂石紅蕭蕭落木見秋江漁郎敲棹悲歌意
不道風吹上客窗

雷裕之釣雪齋

一絲能令九鼎重江海廊廟皆有餘今日天巖風斷渡
先生談笑膾鱸魚

書所見

八口人家麥未黃白頭老嬾色悽涼青裙小婦事供給
土灶烟微蓋香

江頭春日

江頭楊柳弄黃金柳下春江綠已深可見東風能富貴
吹將紅紫上園林

松石圖

怪底白虹成玉氣惟應麈尾影離離歲寒擬共青松說
交分寧無石友知

送上虞黃萬石作天台教

赤城本說是仙家雪白山青江隱沙點染秋霜烏桕樹
劉郎誤認是桃花

二

昔年曾向天台去走上瑯樓看日生跳出海波三丈許
始聞山下一雞鳴

題彭生小景

江邊落木蕭條後百鳥皆生網暑悲會有春風吹衆綠
飛鴻况托最高枝

次焦守贈天台老人韻

老翁教兒惟力田西兒扶翁才及肩不知愁苦衣食足
何用離家師繼前

二

白髮高顛映秀眉小兒竹馬大兒持南風轉夏小麥熟

猶說自迎太守時

八馬

黃髮白面三尺筮八馬最憐黃馬良
勒蹄凌雲當玉輦
駑駘何意後騰驤

送江陰天壽觀吳清隱提點

仙法惟稱遷入山芙蓉城闕在人間
紅霞覆地無人見
惟有飛仙自往還

二

行年滿百漸輕強猶說長生却酒漿
身在清都看下土
更嫌日月往來忙

和宗儒縣尹見寄

為別經年望已深惟思覲面寫丹心
高樓極目應千里
修綆寒泉有百尋

二

升高偵候有千回意倦隨人坐碧苔
忽報輶軒踰嶠過
急須杖策望塵來

賦樹下居

南溪南曲作屠蘇終愧古人樹下居
綠陰十畝人稀到
惟有青天見讀書

二

跋跋黃塵赤日下每逢行處借僧居
老夫衰甚畏祥暴
欲受幽人種樹書

題放翁詩後

老翁行年幾一百
画舸長從鏡裡還
想見揮毫向賓客
眉間豪氣鬱如山

竹林寺姚上人求月潭頌

月到天心無點綴
風來水面絕埃塵
寒山到此無人說
笑殺何由舉似人

題秋江送別 一題薇廟柳

落盡桃花落杏花
曉風吹柳向西斜
玉闌干畔無消息
燕入尋常百姓家

次茂禪師寬字韻為鑑上人題蒙古御史墨竹

借問誰家庭院寬
春風喚起玉千竿
客來看竹無人識

獨自吹笙跨鳳鸞

次薩使君六合詩韻

瞿塘雪解水初迴
浪觸金山怒轉雷
惟有詩人天亦愛
迎船恠雨為君開

二

夢驅樞郎發船去
兩舷成與蛟龍撞
醒時呼童開戶看
月在青天天在江

用志能臺郎韻寄薩使君今為江南諸道御史臺
令史

駒駘博疾趨烏府
鳳皇曹貴拜清郎
羣公幸自在霄漢
小子且可歌滄浪

金盡壯士安足惜酒多好懷聊復開昨夜東家借生馬
昇州高處望君來

為鄭自牧題梅花睡鵲圖

屋上朝來烏鵲語此生直可相隨飛月明星落春風起
應夢雙鬟翠袖歸

題外郎所藏楊補之梅卷其家有清白堂

孤影獨留明月在苦心賴有老天知君家世世能清白
爛熳春風雪一枝

題森綠堂

人言種德如種樹雨露百年初滿盈要識丈夫培養手

綠陰庭院讀書聲

高書記求為獨峰詩

曾到泰山山冢上四垂星斗白纍纍天垓路絕無風雨
雷拱蛟龍飲石池

二

先生家近扶桑島獨上山頭見月生碧海沉沉三萬里
仙人遙住白銀城

題劉商觀奕棋

局間袖手看人奕石爛海枯人不知元是殺机生勝負
机心要看未生時

題李遵道枯木竹石圖

謫仙夜入雷電室捕得飛來石上梭却斫靈楂掛明月
橫吹玉笛上天河

次韵伯循御史登滕王閣見寄

春風一紙至窮檐客久祇令白髮添別地初驚花婉婉
歸時方見月纖纖

題錢生折枝圖枝以三折為一圖前山花其色白
中黃蜀葵末金沙花即常春也

天公自是丹青手白白紅紅錦綉圍一種赤心能向日
百花不敢聞光輝

白衣送酒圖

南隣來饋五經酒束帶近渠意甚真莫謂白衣田父耳

不妨元亮一流人

十二月十三日登鳳皇臺望淮南雪中諸山兼書

道上所見

雪花一丈欲齊樓人住鳳皇臺上頭雪隔淮南數千里

青山斷處是滁州

二

貂帽金鞵綠袴襦騎童自狎小羶車黃金博得歌姬笑
却笑先生夜讀書

次梁有章韵

誰怜范叔老猶寒客裡兼旬酒榼乾天若無情天亦老
自調綠綺向君單

干彥明新築南湖過而愛之

門前流水綠深深不着詩人此一吟昨夜雨來添數尺
小舟莫動白鷗心

送澤南州遊四明

高秋送子四明去正見仙人開石窗恠牒神經讀未徧
時逢白雀下來雙

憶昇州學

至順三年夏予在昇州學官齋廬之西池水汗漫而
多芹蓼菱茨龜魚禽鳥之屬兩鵝鵠時時下之予又
嘗與彥思置酒思樂亭上令僮僕下求蓮葍還持大
魚來二尺昇鼎塔下烹而飲酒夜暑風雨涼甚追憶

舊事因為一詩其一以移晉仲也鵝鵠復下否其一
以移伯羽公嘗與彥思飲亦頗得大魚烹之否并貽
諸君一笑

馬鬣誰翻酒一壺階前平地化為湖荷花菱葉應如拭
鵝鵠飛來定下無

其二

思樂亭前引酒壺蒼奴踏藕作蘼蕘頌衰老子無看設
又入荷花踏鯉魚

香鼎

香鼎茶瓶只自隨先生有興只吟詩借居僧舍無書看
幸有東隣許一鷓

郭巨圖

自恨子驕分菽水獨哀母老共羹藜當時穎叔黃泉策
應愧埋兒郭巨妻

懷薩使君

憎夜還聞蟋蟀吟定知秋色上青林坐看黃葉落四五
記得題詩入綠陰

其二

山雨蕭蕭到楚回夜涼鴻雁漸應寒題詩滿壁無人看
墻下玉簪花又開

宿嶠崿間乘月登棗樹灣嶺下瞰大江洲渚明如
雪悵然懷古

野水蒼蒼霜滿衣隔江歎乃雁南飛江邊洲渚明如雪
恐是王郎訪戴歸

百雁圖

稻梁追逐不自飽風雨急難從友于雁行至性有如此
題作人間百子圖

自壽

小耳長髯高兩顴自持青鏡照神仙夢騎黃雀飛繞日
手弄紫雲行補天

次張義侍郎思親韻

朝會簿書官有程又騎官馬過重城髮間白髮三千丈
盡是愛君憂國情

其二

思親欲歸餽甘旨故鄉有時夢釣游老翁前日寄書到
但言君思湏汝酌

其三

馬上雪花大如掌黃州詩律俱老蒼
紉衣女見手中線進餽頗思魚在梁

綉衣玉節遷文部眼底佳兒百不愁小
還能致賓客何妨老子住南州

觀駕壑船用文公韵

何人雲路駕飛船世上空傳汝濟川
今日休嗔山鬼笑論功只合鎖荒烟

送謝仲連小 巡檢

承平已久桴鼓息事簡官清只煮茶
山崦東西足僧寺時時騎馬看黃花

二

將軍乃是謝博士旌旗渡海壓殊方
丈夫豈止知文字身試兜鍪鉄衲襦

送衛縣尹

秋風吹雨滴芙蓉下馬便看江上峰
送者當歸船早發縣中父老望官儂

其二

軒轅羽仗上雲霄天上瑤臺絳節朝
桂樹陰陰明月出

画屏西畔聽吹簫

靜軒卷

沉沉院落無人語燕子歸來柳絮初行繞東池日卓午
春風吹亂一床書

紀夢中所賦

天高城郭散萋絮日出草木抽金銀山上無泥莫憚遠
下溝路近泥沒輪

病中

化工弄春手未滑虛負幾番花信風自倚東園花未遍
故將小病惱詩翁

其二

憶騎竹馬看階除忽漫人前號老夫病起又添新白髮
可能幾度向胡廬

道上

雙柳橋頭春水生微雲遮日起新晴春風千里廬江道
五馬東來入大城

十五日午次下學是夜宿柘皋

白馬郎君着赭袍中興名將屬金刀將軍快戰人猶說
道士時時問柘皋

丙子五日雪

南土冬暄苦無雨今年春雪沒行車夜深戶外如月白
自起開窗讀漢書

一舸真成貫月槎乘風徑去渡天河人間不用支机石
但乞天孫織錦梭

廓野無人鴻雁靜獨留明月在船窗舟人若道河流急
雪夜灤湖流入江

龍潭寄孟季明

秦淮舟楫密如蚕長送行人北以南離別偏能生白髮
况逢風雨過龍潭

送馮秦卿

天下承平邊事小將軍臥治莫談兵公庭吏散無來客
自教堦前撾鼓聲

二

山頭月落茅君過慎莫抨弓恐雀驚馬上春風三十里
碧桃花下少人行

三

憶君共坐桃樹下畫壁長廊貼彩旗門掩落花聞玉磬
青眉道士學無為

從雪自上人覓茶

蔗漿金椀定何物啜茗哦詩止自佳忽憶綠陰堂上坐
娑羅花影滿南階

瓊花觀

畫閣朱簾映小星東風淡淡度重城揚州十月如三月
却入瓊花觀裡行

送宋武官尉安康之桐城

令人作惡惟離別今日江頭送客還
贏得秋風斜照裡倚蓬滿意看青山

送王叔載上慈溪教

風流文彩似深寧高屐峩冠慰後生
自著仲尼稱祖德前賢制作日星明

二

深寧學聖如朱子一代文章續六經
自著河汾語王道後園莫著草玄亭

題梅

木落山空衆草玄美人明月與為魂
北風遮莫春消息

吹得雪多花更繁

送法璣首坐天則遊四明

僧來每說三山好獨乘舴艋過東湖
育王寺前風雨橫投宿田家滿眼沽

二

鄒嶺山多蘊麗名曾宿山頭看月生
照見齊州烟幾點須臾山下二雞鳴

示郭竒童

竒童十歲事游學五湖四海濶于天
願兒拒戶習靜坐黃卷中間面聖賢

題蘭

是誰識得幽花意
解道風和輕者香
月池玉階今寂寞
猶餘麗句斷人腸

題微廟柳燕

題是送采武臣之桐城

欲霜江氣已颼颼
鴻雁南飛木葉愁
好為故人連夜飲
平明笳鼓出揚州

用觀志能韻寄薩使君

杏花落後見辛夸
烈士無歌憶別離
春草池塘蛙吹早
斜陽巷陌燕歸遲

過賈元寔宅

共過故人溪上宅
春風野水欲綿綿
先生半月無詩思
恐有新詩在雪邊

趙汝甫枯木竹石卷

中林黃葉淨泫泫
眼底崢嶸見此君
清曉東池看黃菊
鳳毛無數落春雲

姑蘇臺

闔門楊柳自春風
水殿幽花泣露紅
飛絮年年滿城郭
行人不見館餘宮

題拒霜鸚鵡

月紛紛露脚斜
守宮紅滴拒霜花
翠衿相向愁清
敢怨春風只自嗟

題桃花鸚鵡

日充貢貯金籠
自怨能言入漢宮
眼底碧山歸未

杏花歲歲屬春風

題觀奕圖

當机慎莫弄精神黑白由来辨未真
咲殺臨枰爭勝負輸他縮手袖間人

次韵薩使君雜咏

萬古情夜聞林竹隨遺笙寧知擊鉢高歌

床頭折脚鐺

二

楚尾望吳頭倦依秦淮賣酒接清夜
忽聞鴻雁

呼明月伴人愁

題吳孟思八分書黃庭經後

嫵媚無邊王右軍黃庭未省博鶯羣
綠陰清晝城南夢見文姬臨八分

題菊

是誰識得幽花意解道風和輕重香
月地雲階今寂寞猶餘麗句斷人腸

舟過吳

昨夜南風開夏江邊野花香入船道
上行人去如蟻匆匆不辨惜流年

題劉萬戶用中所藏馬圖

廐駒駉馬有神牽來但有氣超羣
龍駒川上春風踏龍鳥上紫臺

李五峰集

元 李孝光 著

七言古 三十首


湖山八咏

沙頭酒店

陌頭楊柳金蟲落
雨過桃花香漠漠
沙頭小市類新豐
阿姬十五當壚學
金牛半臂雙鴛鴦
翠杓銀罌喚客嘗
嘶殺門前五花馬
羅敷有夫空斷腸

山頂樵居

隱者辟人如辟席
山上衣冠自中古
長老嬉遊類小兒
一生不識持門戶
南山阿婆許嫁女
北山老翁自迎婦



野花竹葉並銀釵山下黃金賤如土

秋江漁火

八月九月風氣肅白波如山楚天綠蒼蒼夜色入蘆花
船泊中流燒楚竹夜半起坐寒颼颼遙見鷺飛雙白鷗
鱸蓴菜美入我夢扁舟去趁三吳秋

曉寺僧鐘

大星煌煌小星落城頭嗚嗚吹画角机心暮夜伏不行
鐘鳴一聲羣動作市人射利坐待旦居人日晏呼不覺
嗟嗟居人未足多鐘兮鐘兮奈爾何

竹池引泉

山頭窪尊積冰雪銅瓶持歸療飢渴誰家阿奴太怜君

斬竹分之虎豹羣傳聲夜落青雲濕坎中已作糟床泣
回首碧山心獨苦行逐蛟龍作雲雨

木檐蔽日

綠氣濕濕闌干北赤烏欲下嬌無力解衣盤礴忽倦臥
蒼鼠時行壞屋壁客子觸熱不自憐此豈有意清風前
屋頭夜色如霜雪却向溪頭見明月

龜舉迎潮

玄靈吐納日月光軒輊大海敵其陽海枯石爛不得死
甲間綠髮如天長昔年洛書薦祥瑞攻車獨見收文章
天球河圖在東序豈久置汝南海傍

石亭避暑

南山石檻跨絕壑有飛翬者誰所作女媧補天或見遺
徃徃天陰構冰雹天上大火伏不流南山草木含清秋
老夫衰年畏炎熱朝來忽念山中客

鑑湖雨

越角鑑湖三百曲雨餘曲曲添新綠八月九月風已高
詩人夜借漁船宿漁翁城中沽酒來筐底白魚白勝玉
當時賀老狂復狂乞得鑑湖此生足

和叔夏寄童質夫

溪頭春水綠欲活溪上行人馬蹄滑溪山周匝空翠香
駐馬看山惜不發有客有客蒼髯眉蘭襟蕙帶光參差
手携鯉魚壓清酒勸我且復留斯須道傍廢垣蘚花裂

昔人富貴春雲滅此時不飲將奈何為君醉倒溪頭月

青山白雲圖

江氣巖巖如蛟龍曉風吹老金芙蓉神女凌波洗雲去
莫為行雨陽臺東朝來白雲散白石小姑蛾眉翠欲滴
老蛟化作百歲翁彭郎磯頭夜吹笛

秋曉角

青天蕩蕩吞孤月衆星熒熒明復滅城中雞鳴如蒼蠅
城頭畫角哀鳴裂八月九月風驚沙窮邊夜夜吹梅花
四方無事臥笳鼓行子何用思還家

賦絕照法師所畜硯屏山水

東風日莫吹蘭蕊美人相思隔江水九疑青落九州外

白雲飛高明月死海邊八月客風來一尺銀河三萬里

墨梅

銀蟾呵春墨花碧香落江南濃欲滴孤山招得老逋
白雀歸來楚雲黑王孫歲晚客京華衣上緇塵深一尺
小姬未嫁怨東風夜夜高樓吹鉄笛

山宮觀瀑

山宮寺前瀑布流直下千尺垂林丘山僧無燈靜欲死
夜氣如月空中浮黃河崑崙何壯哉鬼神牽挽天上来
先生藜杖來照影白髮千尺空崔巍

送楊明仲

江春老春濃壓酒神藍按綠營東柳風吹落花飛入城

行子思歸百回首越雨洗江鴨頭碧舟子牽船踏沙磧
蕙花香冷楚鷺鳴比戶琵琶呼磔磔夫君五夜夢封侯
城中狐腋高於丘泰山桂樹年年綠鳳皇踏玉聲啾啾

笋

雷公跣跣夜鼓噪驚起龍孫觸旌纛炎沙燒之修尾脫
六丁控搏忽顛倒欲落不落虎豹皮錦裯嬰兒籠大帽
斧斤幸貸凌雲姿留以觀渠歲寒搽

墨竹

蒼髯老翁鱗甲香力能拔山補青岡池邊日日吐雲雨
道人床敷夜氣涼道人嗜睡莫教黜阿翁勸爾以一觴
天邊石上有髯客看汝巉龍頭角長

寄友人

河邊老人念我出遠寄京華書一行為言白髮今多少
又報南園竹樹荒門外石田杭稻熟犢子新生子如鹿
莫戀官家有俸錢長年作客如東

龍鼻水聽琴為劉芳在作

玉筍仙人鞭白犀天風吹度芙蓉溪手脫長劍洗妖血
驚起石上玄蛟啼尖沙燒尾鱗甲赤腹中慘淡蟠雲霓
頑鉄冶出太古色霜露欲結風淒淒老翁摩挲莫驚汝
置之膝上聽其語大聲伏雷鳴地中小聲颼颼吹風雨
阿香辛苦玉龍睡收霆捲電還元氣領底明珠忽迸落
金支羅襪凌波去江清雲暖天無風暗潮自撼黃銀宮

紫髯玄甲臥不動真翁龜息深至踵大笑伏伸忽飛起
清月蕭蕭在秋水君為我起扣其角我亦長歌返其樸
却騎過海問安期還君七尺珊瑚枝

覺此山和尚新住持雙峰作此贊歎之

雙峰矗天佛頭碧雙峰挿地滄海黑道人入山化作雨
藍玉亭邊深一尺光明白氎紅鬘衣說法香南連雪北
紫皇香案九重天日照麒麟生五色

和薩郎中秋日海棠韻

念奴彈折鷓鴣索君王正在彤雲幙內官連夜豎畫幡
苑中明日東風薄妖環生作傾城姿開元始承恩深時
麒麟障泥紅叱枝七寶作鐙黃金羈金鳥東家啄大屋

宮中猶起睡未足翠袖皆塗守宮血專房唯詔環兒獨
七月七日天無風王蜃吐清矍瑜紅錦宮進錦裘金鈿
紫蜀車入長生宮驪山瑤池行幸處秋風吹老珊瑚樹
九華遊魂歸不得應憶仙人掌上露草木腥腐終無情
美人薄命如花輕古聞公桑祀神妓安用絕色能傾城
馬嵬岡頭斷消息去時彩雲化為蝶莫歌玉環能浣人
君看黃菊真顏色

宿雁山下作瀑布詩寄徐仲禮

金臺刺天一萬丈湧出海底開青蓮下有三千六百地
軸相鈎聯壓徧東南地欲折白龍捲海飛上天雷公擊
鼓馮夷鞭龍絜入江化為石巨靈扶起太古色應真晏
坐天人來十八招提若幻出長風吹開天骨碧

張葵齋所藏江山風雨圖

元氣扇翬生蛟龍銀河倒挿青芙蓉九疑正在九州外
碧樹悄悄連青楓上有萬古不死之明月下有掀天巨
浪之長江有客有客陸龜蒙往來江南成老翁天地無
窮屢回首故船去看江上峰船頭十日懸青雨風拔銀
山映東戶山隨沒鵲落中原水作巴蛇走全楚向來英
雄定黃土空留絹素留今古天地一合如金甌萬歲千
秋奉明主

次三衢守馬昂書壘韻

主人歌且止聽我為爾歌作壘不厭小買書不厭多池

上小兒喜誇大睚眦生怒如瞠蛙先生書壘止類巢不
樹長戟兼橫戈清淨如興聖賢遇高明屢煩神物呵却
笑飛仙十二城鬼功日夜長琢磨其南通丹穴其東蹴
女倭北引崆峒把酒之長柄西收西漢專車之木禾嘯
歌聚族無不可被除安用索與儼羽衣伏妖踏白茅朱
鬢善幻言吐囉而我先生不語怪二氏羞伏面覆醜我
壘何所有但聞詩作魔雕鏤奪天巧雅談消衆疴我壘
何所有地窄安不顯惟有屈宋字文聲鏘然相戛摩我
壘何所有而蓄禮士羅羅致盡俊傑徃徃為么麼我壘
何所有而無白馬馱羣書汗牛馬不涉流沙河我壘何
所有而有太白力士靴着艱見天子竟徃金鑾坡我壘

何所有而有韓公紫玉珂通籍引金闕不愧國老瞠先
生寧鈍不為銛寧方不為銳竊聞先生骨已朽空教衆
語漫綾觀春秋說字變亥豕宋楚方言作箕籬後來繼
者浸滅裂何其嬰亂相隨咬紛紜百鳥更啁啾安知清
廟連猗那勿言我壘狹不用草與藁容膝志自足吾其
敢蹉跎問字函丈間吳缺續四科勿言我壘小日月纔
一梭徃來雲漢上飄忽若輕蛾組織成文章飛揚如女
蘿中心若止水水上元不波深如相如讀書屋大如堯
夫安樂窩可以扣我匣中之飛景可以理我鄰上之雲
和絃歌以解吾心之蘊結彈鋏以祛吾愁之誘困如轆
而不輻如舟而不枕高如鶴鳴埵蠹如蜂房渦又如仙

人宅初拔又如野處禮不苛又如橘中飲來去又如樹
間坐以哦如蓮移偃蹇如藻井馭娑又如探虎穴又如
封蟻柯客至足周旋高論如切磋坐以纒輸席酌以鸚
鵡螺佳兒引銀艾諸生避蓼莪開籠放白雀臨池看白
鵝張具設籩膾中厨管饌饌綠晉細唱崑崙蒼頭彈鼈
婆屢歌明之君舉酒叫姮娥豈草露湛湛流水山峩峩
人生意氣足可惜奈此明月青天何昔者介推何為乎
自焚于綿上屈平胡為乎自沉于汨羅何如先生日高
官事了登城照影清江沱日課作詩三百篇翻冷筆史
傳寫訛丈夫作事要磊落布衣狐腋皆委佗海濱白首
釣鰲客清秋策杖相經過

題失

致言東方民力頽少寬達官擔橐橫索錢先生歸到明
主前上言赤子天哀憐仁人在位如解懸大臣不讓舉
夔賢天下盡徵張弦未將俎鼎烹小鮮如吾但願興
力田眼見霖雨開豐年墻下飯牛蓋花圖

次歐陽公效孟郊體看綠字韻題慶上人萬竿圖
白石如白羊起跪變化速芸芸擇龍雖身與雲俱綠嗟
哉西神物曾不受迫逐我中囊中方圓之試餐玉袖中
釣鰲手十年夢漁屋鳳皇千仞姿未肯一枝足自我見
此君夜夜翻凍醪踏倒山中玉板師春風大笑成三宿

送周子善上金華教官

二月已莫江水深春風吹折行人心山頭明月落未落
杜鵑夜半莫哀吟泊船上有青楓林

其二

三月欲來花繞陌又唱銅鐃送行客男兒莫爾可伶生
男兒生身好顏色拔劍起舞雞鳴柵

茅山謠

道人西髮青如蓮大醉上門捫青天青天蕩蕩玉盤出
引手舉盤天上懸銀河傾倒桂樹影長風吹香落丹井
地上小兒沾玉馥白兔急搗玄霜熟悖悖仙家十二樓
夜半起拂跋烏浴手招茅君叫列仙帶劍上立紅雲前
茅君騎虎上天去道人乞我明霞篇

李五峰集

元 李孝光 著

七言近體 五十五首

次存厚周先生曲肱亭韻

曲肱亭前花木深紅塵冒受一毛侵息龜不動養夜氣
化蝶相忘伏午陰富貴浮雲天地醒胸襟霽月聖賢心
南風一枕員清夢竹裡煎茶沃醉吟員一作團

次國性菴韻送之入雁山

竹杖彭鏗响白雲山之南北水之瀕玄猿白雁愁行客
紫氣青霓下應真樂老雲根幾萬本山開石髓又千春
却還有客來相看已與先生隔一塵

和蔡石雲縣尉登西岑

西岑路滑不可上我此曾措六尺藤塔頂雲明疑是雀
松根石老瘦于僧玉簫冉冉飛春縣画舸耽耽夜燈
聞有丹霞舊門戶欲叅大意喜誰升

寄王真人

天上初分玉笋班鞭鸞笞鳳入名山輕輶紫氣浮關近
雄劍紅光照海殷風露吹香台雁北星辰含潤斗牛間
隨龍羽翼多雲雨乞洗平生太僕頑

賀梅

水落山空百草乾天公玉女耐高寒松根雲煖客吹笛
竹外月高誰倚門歲晚王孫猶怨色天寒公主欲歸魂

北風端是春消息吹得雪多花更綠

送王元鳳

並遊英俊盡已貴夫子猶淹命世才老去勛名空汗竹
平生論議只鹽梅江南野水帆千幅稷下秋風酒不杯
鴻雁南歸江漢落卜君到日寄書回

天香閣

青腰神女跪焚香花雨繽紛七寶牀玉白雲英生藥氣
冰壺寒露漱天漿珠簾弄月秋先到青鎖含烟夜未央
為爾題詩向丹笈急驅白兔搗玄霜 露一作漏

宿橋李寺次韻三過堂石刻東坡所遺文老詩

雨花閣前雙桂樹小雲積翠宛重重西臨大野羣水走

南望連山隔海空想見勾吳爭霸主遂令馮李記前功
吾家正住瑤臺下看浴跋烏渤澥來

二

城上烏啼犬吠村泊舟來打了菴門先生三過真彈指
狂客重來得共論坐定却呼諸子見酒行猶說丈人尊
君家好客多如雨一嘿何如發萬言

三

三過堂中舊遊客飛鴻踏雪已難尋錦襜何物關生死
玉帶誰言關古今明月隨人寧有意白雲似我少無心
平生鄉曲維桑梓春酒無辭百罰深

胡節婦

同穴從君結髮時忍逢中路見孤嫠獨衰夫沒姑當養
不顧人言媼有知名續乘車修烈女身傳手澤與佳兒
東鄰日暮歌黃鵠得似共姜誓死詩

送王憲使

綉衣龍節下霄漢早晚即歸明主前江海獨驚華髮在
風霜祇見菊花妍行舟白鷺山山滿落日汀雲樹樹懸
有客嗟然慚未至當窗三嘆理朱絃

泊舟姑蘇臺下

霸王吞雄事莽然空遺陳跡向千年天寒笛起孤城裡
日暮舟行積水邊萬里飛鴻如識路故園黃菊不勝妍
吳王臺沼連衰草惟有西山出斷烟

冶城飛龍亭詩卷

翠蓋鸞旂殷綉牆南公揮涕話先皇鴻宮望氣成龍虎
法駕吹簫引鳳皇今日畫圖看御幄當時草木識天香
先生曾對明光殿奏報新松似雀長

次黃蕙卿韻

黃自号服蘭

漢南五柳此班荆萬象森然欲明竹底孤香天地靜
石間紫茁雪霜盟紉歸璜佩離憂色譜列朱絃太古情
昨夜涼風連天未浩歌忽憶楚修名

次韻薛公三衢石橋

石橋風雨碧冥冥天上神官隔九重吐蜃斜連銀漢白
垂虹遙度翠雲平偶隨木客來看爽逢着仙人不問名

便擬提携九節杖爛柯山上訪先生

二

丹梯路絕倚玄冥上帝高居在紫京定有編書在黃石
欲將神怪卜君平雀歸日莫啣松子人住山中識藥名
蒼鳳鞭鸞在何處遙應隔海叫期生

三

赤芥丹城跨紫冥上天官府玉為京雲含雌虎朝先見
雷挾黃虬怒未平采藥老翁猶避世啣花幽鳥自呼名
若逢仙子休看爽乞授黃底學養生

怒作路

送青玄觀道士玉泉

淮南道士傳鴻寶眸子照人雙電光貫日白虹生玉氣

出山青髓射天漿去年踏雪尋丹井連日題詩滿畫廊
長憶青玄送客處柳花無數繞衣裳

送張生

工祝駿奔 主在奉常最貴九卿早前聞白士搥周禮
遂共清郎冒漢儀騎覓孝廉驚估客屣迎逢掖失羣兒
難兄天上思喉舌願試君家千里姿

玉林卷

天遠鴻日月低鸞輶曾駐沼城西龍光午夜入牛斗玉
氣千歲生虹霓承恩已報紫旄節受詔屢入黃金闈神
媛仙官守桂樹東明碧鏤自天題

送王僉憲

使者樓前鼓三疊猶見車前白鷺翻休嗔惜別把衣袂
他日與誰拈酒醪龍蛇未蟄江水壯鴻雁欲動秋風高
槐樹東頭讀書處更憶君家雙鳳毛

送仲亨文學精舍山長

子合談經上石渠更從文學住精廬到家為覓言偃宅
弛擔先藏笠澤書日落青天猶過雁雪消新水欲生魚
傳聞聖世求遺士倘召君乘謁者車

挽熊天慵先生

歸來白髮照江湖伊呂平生亦釣徒八代文章惟子在
百年禮樂要人扶身騎箕尾神先見夢覺龍蛇歲已徂
幸自有書遺手澤鳳色後日色敷腴

遊雙峰贈覺上人

茶具酒壺從面童入山慎莫作匆匆雪消新水鴨頭綠
沙暖小桃腥血紅吾意生人行樂耳只今杯酒與君同
依依藍玉亭前路他日重來憶遠公

和元澤見寄

平生豪氣欲消磨生對長松盡日哦功業向來芻狗耳
丈夫政爾奈天何眼看孺子分符竹耳厭鄉民怨老禾
忽遣新詩相料理天孫自有織雲梭

次韵送叔夏

陳生蓮萼出沉香張老調高含徵商來日燕翻芹雨暖
別時人趁稻風涼頭二客嘲藝杆乞巧諸郎具酒觴

日莫西風過鴻雁莫言無使問真長

為吳宗師題高年耆德門

秀眉雀髮度期頤膝作兒孫錦作圍賜酒金盤通菜氣
高門銀榜散春暉天文清潤三辰正聖言神明二老歸
萬古君家敦孝友垂魚玉帶出深衣

代送人

別離未是尋常事要見丈夫兒女情太傅中年猶作惡
阿蒙三日即知名北風鴻雁天籠野落日牛羊路遶城
我亦平生四方願先生未可辦歸耕

和王修竹時思菴韵

山公風流日遠矣還向山中問葛強補樹老雲晴亦雪

栖崖殘瀑夜何霜九原父母不可起百世子孫清德長
竹色蒼寒風雨夢只應魂魄尚思鄉

二

道人舊住雪菴旁瀑布穿雲千尺強虛室天光清似月
陰崖夜色白於霜移來怪石欺僧瘦種得新松共徃長
石鼎煨茶歡客合金粟繽紛七寶床

送劉起宗御史內除

身著綵衣依日月手分龍節藉光榮喜聞主上收賢俊
復見朝廷用老成四海清風生玉樹九天甘露凍金莖
袖中自有補衮線要與天家建太平

登平山堂故址今爲司徒廟

蜀山有堂已改作騎馬出門西北行日落牛羊散平楚
風高鴻雁過三城山河已失金湯固汗竹空遺帶礪盟
駱駝坡頭孔融墓令人憶爾淚縱橫

寘磁甌于硯池旁以蓄水十餘日前得花二枝挿
瓶中數日花葉皆萎落戊辰早乍聞香氣滿室視
之兩枝皆再作花葉亦鮮碧佛書云天風吹萎花
更雨新好者感之爲賦詩云

六六畫欄生晚涼青鸞對舞渡銀潢十分天上山河
萬斛人間雨露香珠佩風清生 玉壺冰薄吐蟾光
白銀金闕紅雲合金粟繽紛七寶床

入三茅山夜宿白雲觀贈沈紫玄

山有神靈氣鬱然茅君騎虎鬱藍天自擔詩草看雲去
莫剪燈花聽雨眠白雀空悲壘塚客青牛猶見度關年
五峰雙澗連飛閣聞說留侯更學仙

寄玉虛劉宗師用趙涼公石亭韻

三見重瞳列紫庭還山更咲客居亭雲中雞唱飄金磬
木杪行人度錦屏未悟察微談補譏終憐宣室問先醒
石間泉水冷徹骨長照真翁鍊雀形

二

玉池曾和白雲謠歸訪雲林洗爵陶碧海生平超李契
香山歲晚說劉豪袖中龍泣翻青雨門外風高偃翠濤
勺水祇因人物在孤舟明月掣金鰲

用前韻寄張尊師

鴻雁南飛草木零放歌重上草玄亭坐深狂客俄吹帽
語久清童屢觸屏晏歲風多衣自短空山月出酒初醒
江南客子歸來得漂泊何須影問形

二

自信文章凌鮑謝兼聞詩律逼韋陶雲霞此日交何嫌
湖海平生興太豪麴壘蠓肥吹怪雨松舫酒熟渺雲濤
世人未識能題鳳名刺何妨作釣鰲

為范以善賦雲林清遠圖

九老紫都青鬱然神峰昂脚上蜿蜒風高碧入金莖露
月出青回玉樹烟獨崔飄飄渡滄海大鵬決起負青天

窗中夜看跋烏浴一咲吹笙引列仙

次吳宗師韻寄趙間遠真士

天光水鏡忽同流却憶吹笙駕玉虬
雞下五更知旦氣
雀歸千歲問天遊
白雲為放神峰出
落月能兼河漢秋
會見仙官陪紫府
却逢明主對青丘

次張伯雨韻寄徐間遠真士

好閒還尋幽子廬
習靜自與外人疎
牛羊半下日夕後
鴻雁大來宿雨初
黃菊未踈急釀酒
碧山可數聊停車
眼中之人美無度
十日不見九寄書

又次張師尊韻寄沈紫玄

學仙何曾拔宅去
習靜誰能與世踈
月下雀雛隨母夜

屋頭梅樹欲花初
天隨杞菊甘勝肉
東里杖藜安當車
正欲與君同樂事
不辭書後更題書

二

論文已與古俱妙
為別寧嫌跡轉踈
風雨登樓魚素裡
江湖行李雁聲初
丈夫有志更彈鋏
他日相逢會下車
清曉題還建業歸
來就月理殘書

登石頭城

登高悵望謝家墩
千古風流酒一尊
城郭已非空故國
英雄垂盡只遊魂
天圍建業山形斷
日落淮南海氣昏
未信浮雲能蔽日
欲占北斗問乾坤

二

石頭遺堞滿蒼苔前日英雄安在哉芳草離離為誰綠
野花漠漠向人開鼎湖雲暗龍先去建業城荒鳳不來
二月江南梅未發北風日夜漲黃埃

金清叔為其友人某求夏梅岡挽詩

人說先生是漫塘風流儒雅未俱忘山林白髮空新氣
徑路黃花只舊香勝作唐詩傳衆口獨操周禮付諸行
杖藜苦步佳城路應見梅花為斷腸

過

何日先生起九原已將靈氣返山川論詩轉覺庾陶近
佐主終慚稷契賢拱木笙篳猶落日荒丘翁仲只寒烟
當時故物青山在說到英雄意惘然

鄱江寺擁翠樓

縹渺新居一握天好山將綠到樓前烟霏入闥清談塵
紫氣薰人濕坐氈未放白雲分榻住愛看青雨映簾懸
自怜華髮江南客也為登臨憶仲宣

元日陪趙相國家宴

紅光瑞氣起矇矓元日樽壘對上公轉午東風生渤澥
指寅北斗直崆峒天垂紫蓋黃旌外在瓊林玉樹中
喜承平新氣象三侍合侍大明宮

壽平章涼國公迂軒先生

黃髮虬髯社稷臣手扶七聖轉洪鈞初迎年至收霖雨
遂遣人間識鳳麟紫府微闡珠佩集紅雲下覆捲衣晨

天令元老培皇祚玉女神官守大椿

送伯循御史天錫照磨至龍灣留別

西日杲杲馬蕭蕭君行不行手屢招舟人夜語見月出
客子別愁須酒澆霜天欲雨鴻雁去秋風未落河漢搖
寄語揚州張仲舉月明何處聞吹簫

謝轉運判官張公口號

新分金節來天上即見褰帷下日邊汗竹勲名優大節
鹽梅議論見名賢小人終畏王紘在使者無踰子駿先
亦有庇民要蘇息願將仁氣洗腥羶

同吳明之在靈峰作

人言萬壑爭流勝故作雨中藤一枝楓樹朝來青鼠出
竹根日暮白鷗飛要看雲起水窮處政在峰迴路轉時
莫道白鷗機事少只今野老亦忘机

次陳輔賢遊雁山韻

竹杖撥鞋去去賒一春紅到杜鵑花山椒雨暗蛇如樹
石屋春深燕作家老父行尋靈運宅道人喚喫趙州茶
明朝塵土芙蓉路猶憶山僧飯一麻

雀

胎化有鳥今千年俛啄瑤枝飲醴泉縞帶長身通夜白
丹砂塗頂入秋圓山空蕙帳客初去月落竹房僧未眠
高氣出塵如玉雪長風萬里趁飛仙

題師魯菊逸卷

十年種菊東臯下為愛清香更不衰晚節未愁霜露迫
苦心終與歲寒期南陽身後成何事彭澤歸來祇自知
見說大官憂轉劇平生匡濟欲誰為

發舟錢塘

五年羈客留荆楚今日江頭把綉衣鴻雁夜飛天氣白
蛟龍晝蟄水妖微彈冠終坐王陽起敝褐何年季子歸
一舸南遊真勝事幽期未與故人違

次達公晚過釣臺韻

杳杳青楓江水暗客星遺廟映江花空聞使者來持節
猶有祠官裸聚沙平日故人多禮數終身高誼厭紛華
漢家九鼎如山重霜露凄然在蒺藜

春暉堂

老翁種德百年強眼見諸郎復有堂日繞大椿初轉午
雪融萱草自生香窗前雀髮迎春好庭下鳳毛隨長
慈母殷勤手中線他年願補舜衣裳

送吉希政赴諸暨同知

父書更遣讀龍岫門戶于今擁節旄青海神駒含駿骨
赤霄威鳳疊竒毛懸知貳守分符竹坐使豪民買佩刀
錦纜牽船渡江去到洲明月已應高

為陳師復賦喜白髮之什

猷畝平生足憂患愛將短髮照滄浪意憐得見從渠白
却笑綠愁祇自長秦羽終慚頭有帽馮唐未負老為郎

角中小製聊容世漫向春風舞欲狂

避風龍潭五日登岬即事

建業放舟下京口候風三老正高眠歌長且復忘羈旅
遊遠何如歸力田茅屋晨炊繫牛犢叢祠社祭落烏鳶
故鄉風動渾相似祇憶南溪踏釣船

冬至

造物何言播大鈞又迎南至嚮初晨天開黃道三辰正
日轉青雲萬象春始復已知涵太極乾坤元自有深仁
相君淺醴珠林館眼見梅花一笑新

送客

攜手出門倍惆悵北風吹丹楓樹林柵中雞鳴天地醒

城頭雁去江湖深行人萬里稀歸夢烈士向來多苦心
東西相望道路永一書可抵雙南金

送人還鄱陽

東西湖水百花洲行子歸時雪已收明月可能隨客去
浮雲自足使人愁重來柳樹應千尺相見梅花隔數州
我亦高歌望吾子春風好在仲宣樓

喜聞開經筵口號

封事如蠶照綠函九關虎豹靜眈眈天垂赤縣神州外
地入黃旌紫蓋南明主飛龍當位五重臣賜燕拜恩三
喜聞經幄黃髮致主唐虞政不慚

同薩使君飲鳳凰臺

鳳皇高飛栝四海錦袍猶賦鳳皇遊天隨沒鵲低淮樹
江學巴蛇入楚流勛業何如飲名酒衣冠未肯望神州
天涯芳草淒淒綠王粲歸來更倚樓

次薩使君登石頭城

西州門外石頭寺欲說英雄綠髮凋王氣黃旗千歲盡
水聲廣樂六朝時白鼉裘壞埋珠押玉燕釵飛墜藻翹
重到謝安携妓處維舟寂寞聽春潮

送國侍者

離別還同箭離弦題詩修竹記他年
芻人楚語時相問
佑客巴歌也自傳
遙望亭驂上南斗
正逢飛雁出青天
綿綿遠道勞歸夢
忽見梅花意惘然

舟中上趙相國

錦衣綉纛向秦川有客將離獨黯然
日食猶分丞相餅
傳呼自愧孝廉船
春風候雁青天外
暮雨行人積水邊
因過清湘聞欸乃楚儂此曲至今傳

泊舟銅陵縣下

銅陵縣前風已急鷓首凌波破石陰
日送飛鴻知北鄉
夜聞羌笛起南音
地通三楚青山斷
天入九江春水深
五穀敢忘今日貴
相如自有白頭吟

正月十四日夜宿巢縣

旅食京吳改歲年春風遠道思綿綿
青山故遠周瑜墓
明月猶窺亞父泉
楚縣城荒惟画角
灤湖日落有歸船

天涯芳草淒淒綠想見登樓憶仲宣

松風閣

上方碧氣隔塵寰絕頂巋然丈室寬風雨夜深珠佩語
江山秋淨玉笙寒老龍抱月髯猶碧獨宿驚雲夢欲殘
會得無聲無住相曹溪有色上闌干

送鄞縣尹

秋風吹女髮成絲移病還家竟不疑官似伯強曾補處
身如元亮已歸時青山老去渾相識黃菊平生最受知
我亦相從上吳會夕陽騎馬看殘碑

題本覺寺空翠亭

琅玕千畝映江渚天籟沉沉欲下來已見鳳毛沾雨露
長疑龍氣扶風雷樹團車蓋春陰合月射金銀夜色開
中野白雲如白石不辭一日到千回

送郭子熙歸江西

我來錢塘住三月又識南昌郭子熙好古大類歐陽氏
作歌今無韓退之曾見魯晨援赤制還尋唐刻問苓芝
買船持女渡江去秦望禹穴故多奇

十六日宿蕪湖縣

蕪湖縣南泊船夜欲霜天色已蒼蒼雲山欲曙江流紫
洲渚初昏燒火黃自咲頭顱向華髮尚為羈旅適他鄉
東船西舫無人語可惜窗中明月光

喜雨

綉衣持斧後猶新又為人間洗火塵符節歸巡九江郡
函香行禱獨山神沾塗宿麥回清潤採掇嘉蔬訝碧勻
天上於今待霖雨鳳池花柳不勝春

二

淨洗煩冤六合新清晨沙路絕輕塵泰山自古興雲雨
淫祀何勞問鬼神淝水急流舟欲起灤湖浮黛画初勻
客遊却憶魚羹飯歸到江南及暮春

客孤山

孤山山中筍蕨香孤山山頭月湯湯桃雨洗除脂粉氣
柳風醞釀麴塵黃江山有待詩應老天地無情客謾狂
行李蕭蕭明日發烏盞角外轉淒涼

次韓希古觀燈韻

大城春夜氣曛曛燈火如霞翠欲空牛女含星雙闕上
湘妃弄月五雲中電燒魚尾蒸天紫山湧鰲頭照海紅
北斗南頭有詩伯九天珠玉吐春風

和張顏樂秋夜聞蛩

西風蟋蟀共悲涼病木飄殘托腐腸鄰媪秋來借燈火
行人夜語怨參商啼殘紅葉催霜雨吟傍黃花飲露香
商榷秋風與秋月腹中那有許雌黃

二

候虫磔磔語新涼大耐平生鉄石腸茅屋清秋動机杼
土階永夜答宮商雲深過雁摺鳴琴月黑飛螢度篆香

遮莫丁寧驚嬾婦曉花猶愛理花黃

和人遊雁山家字韻

北雁山中路詰曲夕陽木杪見人家
筍輿穿樹驚霜葉
銅杖敲雲損土花
白雁秋高還蕩頂
亂螢月黑出簷牙
匆匆但得皮膚耳出外逢人莫謾誇

二

峽中鍾鼓十八寺
山腹茅茨三兩家
雨後亂溪青似髮
霜前痛葉赤如花
懸崖萬仞塗猩血
恠石千株錯犬牙
牢絆芒鞋行一月
出山慎勿向人誇

入雁蕩山

興國年間路始開
前朝碑墨見蒼苔
雁橫蕩月驚寒到

僧踏秋雲看瀑來
一嶺纔教靈運識
萬松都是了翁栽
此行曾與秋風約
說與山猿不用猜

予早作堂南戶
二致止余足聽厭
其欲而驅之
其一颺去其一伏
而不飛蓋貪而不知止者
遂撲之

因託以詩而警夫貪墨者

利口端能作禍樞
來從下土即紛拏
飽思颺去僅免死
貪不知休或殞軀
去楚原非愛醴酒
假齊終必化臬菹
二虫得失寔勿論
門戶碧山如画圖

牡丹

富貴風流拔等倫
百花低首拜芳塵
画欄綉幄圍紅玉
雲錦霞裳踏翠裊
天上有香能蓋世
國中無色可為隣

名花也自難培植合廢天公萬斛春

題雁圖

蒲葦冥冥秋正踈江山渺渺更愁予颺風吹影橫青女
落月收聲望白榆夢寐平生繒繳遠頭顱萬里稻梁初
前身定是典屬國曾見早栖雪滿鬚

與郝萬戶

貂蟬奕葉舊衣冠玉雪精神鳳羽翰騏驎已聞開道路
衣裘自可護風寒平生翰墨殊相識老大功名轉耐看
燈火新涼評麗句城頭北斗又闌干

道適句章艤舟曹江入謁曹娥墳廟

仰天誓下殺蛟魁敢擬濤江得父回從古生民皆有死

獨聞孝女自興哀巫言先見清風起神降惟同夜月來
遺塚斷碑秋雨裡杜教黃絹惡雄才

為栖霞道士陳玄儕賦善宮

爬沙緣上青霄裡歲久神靈故解飛憶與嫦娥來月地
即同月兔歎天庭清光忽射樓臺白夜色能留霜雪輝
窗外梅花臨鏡發却疑道士羽為衣

吳文靜晚香齋

綠陰紫茁已森森直待秋風滿地金烈士總知存晚節
可人終不負芳心肅辰霜露那能酷正色馨香不火侵
元亮平生多勁氣莫年華髮遂幽尋

岳王祠

人臣功高逢忌嫉令終美殞古來稀山東義士向天哭
海外將軍被詔歸奏入國家無吉語獄成廟廟定危機
嗚呼信史為君諱自壞長城可嘆唏

松風閣

謾謾長松作人語開門出聽又千回海潮欲上寒江動
瓦屋微鳴小雨來不用吹笙隨燕婉如聆廣樂上蓬萊
往年曾向三茅聽餉我丹砂滿玉杯

送人遊天台

比去蘭亭修禊後平明驅馬試征衣海邊山盡天無盡
花底春歸人未歸一浦潮生魚入市千山月上雀投扉
舊游二十年前路辜負東風賦式微

三益堂芙蓉

三十六陂烟水碧紅紺騶客著雕闌守宮血暖娥池曉
翡翠巢香玉井寒風急周郎揮白羽日高毛遂歆銅盤
絕冷月落無人見颯爽英姿大耐看

冬日見桂花

北風吹倒碧琅玕金粟栖枝露未乾翠氣遙連仙掌曉
天香微墮玉壺寒明蟾照影臨丹闕青女銷香著画欄
可是天翁露消息小春先得一枝看

訪王君濟

好溪沙渚更停橈來訪仙人王子喬稚子候門如有喜
故人索酒不須招門舍古樹春先到簾映青山雪未消

老子紅顏如昔日只添白髮不相饒

寄別峰

雨洒高城柳散絲扁舟長憶送君時
前時書去惟憑客今日詩成欲語誰
修竹娟娟當石淨歸去故故入山遲
平生不解求人識慚愧黃金鑄子期

咏棋

國手功名滿世間幾多奇思上眉端
人心險處千机變局面危時一著安
陣入烏江迷項羽勢窮赤壁走曹瞞
近來黑白無分曉輸與樵翁冷眼看

七月十四夜宿東縣明日登山亭

海上歸來訪舊遊草堂開宴醉新秋
金花木落魚初鱸

玉液香浮酒旋瀉展席涼風依綠樹
振衣斜日濯清流五年不見孫郎面
一咲相看搃白頭

二

高人清隱住衡茅倦客過從話舊交
露下碧梧啼絡緯霜凋黃葉挂蠟銷
藥瓢或見臨川洗茶臼顏聞隔竹敲
窮愛夜涼連榻坐共看明月學吹簫

送趙岐山

饑馬蕭蕭靜不譁大城落聽清笳
北風吹黑貂裘領明月磨青寶劍花
論定男兒能報國古來烈士不思家
酒闌咲脫吳鉤贈遠道相依當輔車

戲東王季行

才子勞心治墨莊風流文采足飛揚蒲萄釀酒澆鸚鵡
桐葉題詩咏鳳皇春海画闌花欲語月臨華屋生香
高堂想像焉能賦翹首西風引興長

送蔡縣正

齊唱驪駒白玉珂使君千騎擁鳴笳鹽梅霖雨真吾事
劍履星辰舊世家天碧玉笙寒裂竹江清画鷁暖圍花
九重香案紅雲曉日曬麒麟臥紫霞

送余同知

冠蓋風流二百春太平盛事復還真山林杖履何妨樂
丘壑經綸未苦貧丞相座間驚小友文公席上著元賓
間中日月清如許政恐功名解逼人

二

樓船欲動鼓三疊玉節霓旌降素濤丞相何須將更至
大夫寧敢怨賢勞蟾蜍出海城郭曙鴻雁順風河漢高
孺子自與使君約他年竹馬候江臯

荅台州中山

兩鬢星星白髮翁扳援如與上天同山藏白雀暮烟紫
石枕金雞落葉紅地載樓臺歸足下天垂星斗落胸中
詩狂欲把塔為筆倒蘸長空寫碧空

至九眼隄門

飛梁壓水接通津潮落蒼崖見蘚痕山色凌空孤鳳舞
水聲觸石萬牛奔風扶酒旆搖亭宇雲趁征帆出海門

人物盡隨時節換獨留鷓鴣伴江村

題梅仲蕃深淨亭

來看紫鳳啄琅玕
萋萋蕪花午影圓
渭水有雲香不斷
華峰見月骨應仙
猶聞龍化鷲
投策會報龜來迎
釣船近日雀雛能
送客獨留被髮看青天

送友人金陵漕運

金陵從古帝王州
漕運君今事勝遊
丹鳳有臺春樹老
烏衣無國夕陽收
潮聲挾雨翻蛟室
山氣浮空結蜃樓
白髮高堂日相待
早回蘭橈莫淹留

讀陶隱居九錫文錄呈趙虛一真士

獨雀能空雞鷲羣
仙階還許世人聞
題詩未倚李太白

學道願逢茅長君
白鹿隨車繞山水
丹砂入鼎染溪雲
先生少留亦不惡
共讀華陽九錫文

次潘尊師韻

潘名雅言嘗住大茅峰
下後住白雲觀
今年七十六
詩為王季玉忌日作
王名景溫季玉其字也
始樹白雲崇福觀
每十二月十二日祠祭忌日

神君控雀下冲融
看浴跋鳥碧海中
仙去空遺三尺劍
道成更住一拳宮
金丹授訣君應熟
修竹題詩戒未工
忌日諸孫起祠祭
令人百世想玄風

十三夜聽吳道士吹簫

梓潼道士目方瞳
酒醒吹簫月影中
赤岬銀河有銀氣

千年萬壑自松風
泃泃綠水初生夜
蕩蕩青天直下籠
白雀歸時應有
神君儼候錦城東

過山寺

隔溪茅屋半開扉
綠護晴林盡打圍
野鹿飲泉山影動
幽禽出樹岼花飛
百年往事回頭換
一路斜陽送客歸
要識上方何處是
鐘聲隱隱隔烟霏

雨後村行

雨過沙頭落漲痕
滿林紅葉自紛紛
水平路面高低見
風約溪聲斷續聞
老屋無橋橫獨木
滄洲雁起寒雲
殘蘆頭頂花如雪
莫是吟人鬢上分

二

澤國秋深景物非
西風獵獵又吹衣
路行落葉離人去
山破寒烟獨鳥飛
潮信到灘推月上
隣家停火候船歸
村醪香軟鱸魚美
自笑吟邊貌不肥

苦竹村

蓋輿軋軋路高低
苦竹村南古峴西
草舍爨茅留客飯
麥田焚棘斷人蹊
花梢春意闌禽語
石磴霜痕印虎蹄
心自愛閑身尚役
好山何處是真栖

十里

官河十里數家莊
石埠門前繫野航
梅月逢庚江雨歇
稻花迎午水風涼
橋橫自界村南北
候斷誰知里短長
倦矣野塘行瘦馬
雲山杳杳復蒼蒼

秋晚別業偶成

平原渺渺路西東，莖葉纒黃柿半紅。
獺下江潭塘水涸，鼠歸墻屋野田空。
燒烟不斷經秋早，草路無多徹夜風。
行過小橋入住處，短籬清曉護畦菘。

為學古澹藏主題，安慶金君美秀野。
次潘仲舉韻，戶外黃塵滿地流，亭邊山色轉幽幽。
牛無令闕殘吾竹，客與俱來上某丘。
池上小風花樹午夜深，踈雨橘林秋老翁獨樂寧。
非計正使先生憶釣遊。

遷新居與表弟徐元澤對床臥，夜半風雨作推枕賦。
此復就枕夢縛秦檜，既寤再和前韻呈元澤。

此身畎畝亦何憂，出處男兒要熟籌。
風雨對床兄弟夢，

山林築室子孫謀，酒無着處紅生面。
老欲來時白上頭，長怪平生王景畧。
只將捫虱取封侯，鐘鼎山林不損憂。
為君借箸席前籌，身前恐是岳鵬舉。
生子要如孫仲謀，那用功名懸口角。
不緣憂樂改眉頭，栽花種竹溪南宅。
擬比人間萬戶侯。

泊舟姑蘇臺下

望遠升高意慷慨，姑蘇臺下水泱泱。
重湖日落波浪紫，大野風多草木黃。
臺榭當時藏妓女，霸圖無乃失金湯。
猶憐壯士收金楚，却悞君王舞袖長。

送客

日日秦淮送客船，江中八月雨如烟。
道逢鴻雁東南去，

眼見蟾蜍四五圓美酒相看不成醉黃花別後為誰妍
貂裘已敝秋風起我正思歸種石田

題宗師吳閒閒詩卷

簇仗神官踏綵烟玕琪華靜白麟眠夢騎黃鵠飛遶日
手弄紫雲行補天歌咏太平追雅頌扶持聖主屬神仙
宮中應受長生訣珠笈瓊章映御筵

聞詔赦因次王繼學大參聽詔韻

陛下聰明世武間尚方賜劔斬三姦樽開白獸千官入
詔下金雞萬國歡宗袞會聞朝日馭神駒自合在天閑
觀書一夜思賢佐廊廟于今即詔還

其二

書 鳳詔下初聞聖主應思奕世勲抗直甚知楊震論
持盈不媿老聃云山寒白石羊群起城轉雙江燕尾分
定有新詩荐賓客買絲願綉信陵君

送伏回川長老遊京師

京師自昔精藍盛西域仍傳象教新天上香爐朝佛祖
雲中星宿號仙人瑤階乍識九苞鳳金地長逢五色麟
東土高僧妙說法歸時更禮老能仁

用羣字韻寄伯雨尊師

使輶草草索離羣南北東西不更聞別去廿年如夢寐
山頭一日忽逢君蓬萊閣裡呼明月撫掌東邊洗白雲
詩律老蒼無可說祇須出酒覓論文

謝劉宗師雲江先生三用羣字韻

神宮青女動成羣宮殿香多下界聞絳節珠幢引仙子
千秋萬歲上明君天垂白獸開金甕日炙麒麟臥紫雲
寶劍玉符生五色自將拂拭認龍文

登崔情超遼亭

崇禧宮北水二源崔情亭前雲一垣烏鳥啄林動落日
黃菊辟霜當石根自恰高坐看修竹翻畏歸時遭閉門
下到南宮見月出忽憶誰家老瓦盤

商山四皓圖

帝憂母主重廢嫡人料子房宜與謀盟詛不虞高后劫
卑辭翻為建成籌腹心已去悲歌起羽翼雖成女禍留

俱墮術中曾不寤先生輕出後人羞

徐尊師壽父母詩卷

天公不妄與人齡眉壽原從種德生翁醞真酬借老顏
子孫亦有養親名萱芽含土春輝暮椿樹生香崔髮清
何日奉卮看盛事丈人百歲住青城

自壽

小耳長髯高兩顛自持清鏡照神仙夢騎黃雀飛繞日
手弄紫雲行補天幸自讀書逢聖世喜聞 起遺賢
平生儒術須君試更看渠能晚節全

次張伯雨韻

佳士望見知耐久俗子定交心已踈中村有客賦招隱

後日何人問遂初
連官不入襴衡刺
逸史會給陳農車
我見彌明大玩世
自言不解人間書

題崇禧宮道士蘇仲簡梅石自號卷

句曲二竒在肺腑
九老嚙嗽飛蕊漿
貞女玉貌臨臺迴
丹氣青泥出戶香
先生願試調鼎手
神人自有補天方
春風吹碧琅玕子
為爾題詩向石床

題奉馮秦卿索榻

將軍結髮事俎豆
却領貔貅節鼓鞞
試馬未妨騎惡馬
讀書頗復聽靈雞
即逢佳士為下榻
自督兒學灌畦
投夜買魚為酒事
懸知二客醉如泥

和范文正公遊茅山有作韻

著書寂寞舊相如
也愛名山亦駐車
丹氣忽騰山木上
異松画出雪霜餘
致君堯舜寧無術
願學神仙自有書
念我功成拂衣去
却從句曲卜吾居

次疎齋公書句曲唐侯韻

盡說唐侯濟世才
一車還過句容來
池塘水滿曾看影
花柳春深定手栽
賓客能言為縣日
兒孫曾築讀書臺
于公種德天公咲
大馬高車祇用猜

癸酉元日

造物無私播大鈞
江雲不動養麒麟
青陽發歲春風令
黃道經天日馭新
仰見瑞圖開至理
元知宰相有深仁
錦囊自有清河頌
去上金鑾獻聖人

春雪寄薩使君

江東精舍好修竹，
飜憶吾廬近北林。
急雪未須愁見現，
白日自足懷羣陰。
烏鵲飛來三統夜，
老驥平生千里心。
張燈送客出門去，
城頭画角聞哀吟。

次鄭以吾清明韻

衢州城下清江好，
一舸因君作重尋。
早日頭顱能種種，
春風門巷自深深。
窮魚但賴升斗活，
老驥終悲千里心。
我別先生知更苦，
出門搔首望飛岑。

二

壯士曾上河汾策，
寂寞只垂後世名。
漂泊鄭虔祇老去，
佯狂李白似平生。
衰翁猶是人麟鳳，
佳士能為世重輕。

我送君歸吾亦去，
欲依僧寺聽江聲。

送朱希顏

煖入舊年晴雪消，
聞君昨日買輕舸。
祇冷老母思驥子，
還喜諸公識鳳毛。
何日重逢曲阿酒，
他年會聽鬱輪袍。
吳姬莫唱花滿店，
雨後秦淮春水高。

送古淡上人用張仲舉韻

夜聞石鼎車聲苦，
夢遶揚瀾浪蹴天。
狂客還尋破蠟錄，
清童解荅野狐禪。
水來巴蜀如衣帶，
雲斷中峯見岳蓮。
恨殺秦淮舊歲月，
向人離別照年年。

送許叅議上官中書

企想才名二十年，
遽陪清宴賦登臨。
蒼生正藉經綸手，

烈士盡知匡濟心已覺東風蘇萬壑未愁白日作輕陰
官船擊鼓催官發一夜秦淮春水深

次王彥謙韻

昇州逆旅竟何物寧識人間有子房東野暮年只說劍
臨昂當日亦求凰魚生春水桃初雨雉沒高原草欲香
寄語歸來雙燕子烏衣巷口又斜陽

次薛公信安太守韻

江山好在足淹留莫上新亭對楚囚赤制文章駭史籀
丹書功過掩春秋論心且復歌明月知己何勞怨白頭
我亦江南未歸客夜來獨倚仲宣樓

二

五馬何為嘆滯留春風夏雨洗囚飛花寂寂轉亭午
衆綠含含向麥秋衡鑿自因居省眼竹符亦合需頭
行天明月三萬里後夜相思更倚樓

副提舉陳衆仲乘傳如臨川為江浙行中書請起

學士虞伯生投文賦詩送之

平生識公殊恨晚曾見雄才九鼎扛向驚使星入吳楚
遂駕官舸行浙江玉為龍節指南斗山似蛇身盤碧窗
聞女去訪青城老安得化為黃雀霞

聞得孫

曾占吉繇非熊羆喜氣俄尺紙馳為報生孫留綠鬢
頽慚為祖攝霜鬢俊聲莫作三珠樹佳夢先驚五彩旗

願我得齡踰八丁
眼看文字屬雄兒

送昭切判官保時中

材賢宜置鳳皇曹
將相東行擁節旄
使者當時聞進孰
侍臣豈敢賦賢勞
河渠冰赤鯁鯁困
江漢風多鴻雁高
春事即乘輶侍發
願陳計畫補鈞陶



國家圖書館, NATIONAL CENTRAL LIBRARY, TAIWAN, R.O.C.

李五峰集

元 李孝光 著

五言絕句 十九首

清音亭 次雪菴和尚韻

天地播清籟僧來聽法音
雪菴歸去後多是少知心
諸葛武侯

自謂吾管樂或人猶笑之
豈知扶漢手猶是帝王師
紈扇題倪元

野水見落日幽人殊未還
白雲滿洲渚搔首望青天
記持子所作山頭有草詩

山頭有長草山下有短蒲
但見長草死不見短蒲枯

松雪竹石

幽篁碧峭峭白石白粼粼帝子吹簫罷月明愁殺人
子昂畫

汀洲木葉下斜日倚湘娥我欲采芳草洞庭秋水多

倪氏雨竹

落日楚江深鷓鴣啼遠林相思不可見池上寫春陰

段氏扇子

江上竹枝歌爲君擲兩蛾秋風團扇底零落黛痕多

呂子敬所藏趙子昂墨蓀

彼美幽人姿妙此造化寄秋風日夜來孤香動天地

采芹爲樊子芳作

采芹復采芹芹生纔出泥朝食君作羨暮食君作齏

題皎如晦長老煮笋帖

自修良獨坐忘在轉身觸所以千載間尚想人如玉

寶林八咏

飛來峰

山侶琅玕小地將秦望雄越王歌舞處長作梵王宮

應天塔

飛來山頂上塔有應天名天作穹廬勢惟須一柱撐

羅漢泉

稽首阿羅漢神通五百年石中能鑿井泉湧幾時休

靈鰻井

一勺石間泉如聞异物眠今年雷鼓壁可出作豐年
大布衣

曾被白長身
爲呵煩鬼神流傳六百載
捧匱見如新
古鉄鉢

一日惟一食不著萬象
撓自古學道人本領不求飽
深竹堂

枝枝含清風葉葉濯朝露
堂無萬箇竹炎熱如何度
盤翠軒

鳥浴旋木杪危軒臨廣谷
雨餘朝日升萬象如何沐

李五峰集

元 李孝光 著

五言古體 九十一首

靈隱十咏

靈隱寺

南州綿西極太山樹崇闕經營緬齊梁宏麗自吳越
玉水生虹霓金樞孕初月稍高得縱觀川流淨如髮

冷泉亭

寒漪亂方折倒影盪晴宇濫觴側江流盈縮見寒暑
下土方早曠神物悶霖雨水上有佳人不得與之語

蓮花峰

怪石蟠厚地神功謝琢飾水深玉井凍風多日車側空
聞涉江咏尚見嘉樹惜匪石有遺戒我心不可易

飛來峰

石室藏素猿丹穴養玄鷲刻劃鬼力窮疏鑿禹功舊貝
葉出虫書璞玉泯螭鈕棟宇何王作後人遂奔走

煉丹井

人生百歲期乃欲比金石鬼神守丹火龍虎泣玄液寒
泉石已凍繁露秋易碧往昔汲井生高舉有飛鳥

呼猿洞

猿靜不自躁栖宿有常處朝飲既在澗暮止或在樹冥
冥青楓林上有飛鳥路思爾不可見去隱南山霧

水臺盤

幽幽南山下中沁有歌石窪樽絕製度曲流泛醪液自
鑑愧濯足臨深懷衽席惟應洗心者能使百慮釋

翻經臺

高臺亦荒蕪雲氣久已寂伊人樹白業後人念遺跡虫
魚出華言科斗藏壞壁嗟然不可見風雨日易夕

高峰墻

地勢傾東維華嶽持厚載靈戶俯河漢雄標拔江海初
日射清暉宛虹貫華彩揚舲指吳越遙見出崦靄

龍泓洞

陰風肅然至神物在洞府雷火走石間虎氣上幽處泄

雲無時出積雪自太古屈蟠混泥塗作解致雷雨

寒汀小景圖為去疾監丞作

秋氣向黃落小雨收虹霓綿綿淑浦間水乾見塗泥蘆
人往何處艇子亂鳧鷺飛鴻惡見欺決起無東西江水
動落日羣飛終不迷豈無稻梁願湖海尚擇栖冥冥一
高舉不知弋與罟感此三太息北風吹草低

雙竹詩卷

老翁牽六鰲投此虹霓竿二子嘻已茁立玉照歲寒精
氣元不隔紫巖雷雨翻神物有如此豈久泥中蟠

招張子約

棗花昔離離棗實今纂纂人生將幾何乃畏余髮短不

見或兩月可莫一昔歎江水今正微望子在中渾

題梅石為王集虛尊師書紙屏上

北風吹倒山三日雪塞門悒悒岩石裡萬木命歸根天
翁粲然咲洗出明月兔春如鼎中香已覺火力溫

和天錫郎中城字韻

朝登石頭戍暮還建業城野花滿嘉樹芳草亦復生日
夕城郭暗仰見天星明登高地勢壯誰謂東南傾

送蕭仲威御史歸葬事

提提枝上鳥亦有哺母恩傷哉孝子心夢見母倚門有
心心亦折有淚淚如河豈不念父母尚奈君恩何

清暉

颶風飄餘靄旭日散清暉雨止山逾綠草木含芳菲林
居多樂意未與佳人違靜者有妙理觀此萬化机行逢
流水源坐悟白雲飛仰天發孤咏怡悵以忘歸

雜詩

高堂風雨夕深夏生微清但驚秋氣至壁間蟋蟀鳴起
生念始衰遂令百感并前修諒非遠學道何由成哲士
不言命烈士怕徇名放歌淚欲出乃復有吾生

其二

有風西北來鷲鳥盡高飛山頭兩黃鵠羽毛何摧頹黃
鵠子衆多路遠不得歸在者雖小弱鷓鴣惡未乘之哀鳴
繞樹飛欲去重徘徊我往喻黃鵠鵠汝且勿悲幸爾族

類蕃飲啄在天池一朝啣母子去令汝母子生光輝鳳
凰參翱翔長無渴與飢鷲鳥皆媿死寧論嚇鼠鴟

其三

芳草搖微風幽花泣輕露清晨有佳氣力疾坐南戶感
懷聊晤歌思遠屢延佇吾道未福迫誰能自勞苦俯仰
塵世中煉修亦何補所以王子喬陋世自輕舉

其四

幽人有佳期乃在南山陽上登南山冢雲氣鬱蒼蒼中
有雲栖翁得道壽命長被髮日中坐眸子如電光粲然
啟玉齒微吟入瓊章見之炎熱除冰雪置我腸日夜聞
道妙飢食日月芒舉世無此樂樂哉不可忘

其五

促織復促織奈此秋氣何
屬我有所思倚戶商聲歌
男兒乘盛名千歲乃不磨
勲業未及樹流光已蹉跎
志士貴匪石貞女誓靡他
勸汝一杯酒高鳥無網羅

其六

北林有秋聲夜靜獨先聞
寒暑迭相謁萬物何芸芸
深坐百憂息仰見孤飛雲
嗟予亦有念誰哉致夫君

其七

手種庭前竹苞生漸成叢
枝枝濯零露葉葉含清風
一罹斤斧留遂爲草莽蒙
君子有終惠幽人寔所憫
蕪穢既云剪膏沐亦易克
己欣集鸞鳳將恐媚虬龍
榮悴自

有時時哉係其逢

其八

予昔年始壯讀書無雜慮
晝讀不知疲宵誦亦忘寐
深念古人事怕恐已不逮
及茲五十餘懶惰疾病至
抽書目增眩就寢心苦醉
一夜再三起悲傷負初意
寧甘即摧折躑躅類老驥
終嗤一駕駕長蓄千里志
吁嗟先民教學道功不計
往者距可追來者猶可幾

其九

童子小而黠鬢髮白長身
性惡不可蓄使氣聞比鄰
幸哀夫子老爲拂席上塵
左右驅蠅蚋令無污冠巾
升堂扑犬豕腥臊不可聞
庭宇日清淨未厭洒掃頰
孰謂童

子惡童子仁以勤為我除衆患道遙任天真取人棄其短有過寧掩勲吾衰方藉汝但稱童子仁

其十

美人不可見夕河在雲端金莖高露隔玉井碧梧殘雞鳴戒天旦虫語傷夜寒同心疲夢寐遙知行路難

讀韓信傳目和李白贈新平少年韻

信之所以成功以能忍也惜其能忍于跨下之辱而不能忍假齊之請遂令功名不終亦可悲矣余觀太史公書追羽垓下事是時漢高方為王而書帝信猶為齊王而書淮陰其意微矣反覆讀之令人嘆息不已太白詩云韓信在淮陰少年相欺凌屈体若無骨壯

心有所憑一遭龍顏君嘯咤從此興千金荅漂母萬古共嗟稱而我竟何為寒苦坐相仍長風入短袂兩手如懷冰故友不相恤新交寧見矜摧殘檻中帟羈縲鞴上鷹何時騰風雲搏擊中作能

馱馱不可超國士安可凌當其跨下辱竟有神明憑蓄憤久乃泄隆準亦遂興錫圭王全楚遺烈士所稱乃公少念功自足傳雲仍嗟乎烈士心皎月在清冰貧賤寧愧恥富貴曾不矜草間鷄與鵲自同脫臂鷹

登任玉女仙臺

東崦有仙臺仰見地勢隔冬日轉清麗過午得散策山花亦透逸山鳥鳴始踈微行大松下其石盡玉脉路經

福鄉井帝子動精鬼會意一莞爾吾道未福迫阮籍竟
何物但作眼青白何如張山人有此捫虱客

送醫師王宜往維揚

醫疾如醫國乃貴知慮周生死固有命慎此湯掖投瞑
眩不足驚坐令積疾瘳活人樹陰德豈愛千金酬上天
工報施能令子門高勿言醫小技大者喻國謀爲術宜
慎重衆藥亦預收吾言如足念可比明月球

夏日荷亭即事

避暑何所適南亭俯中渚鷗鷺了不驚况復涼入髓水
華露未晞香氣紛旖旎美人美無度嬋娟照江水潏潏
玉雪姿何能畏祥暑南風從天來入我懷袖裡高氣行

青雲且置吾白羽邇來不飲酒煮藥咽香藥羣賢政自
佳有作動盈紙但恐清興闌遭此催詩雨

天台誑送人還山

前年過天姥夜起窺扶桑碧海三萬里日出吐九芒飛
光上瓊臺瓊臺與天通積雪自混沌却在元氣旁龍駒
啗靈芻白石皆白羊神人久不死騎氣凌蒼蒼手把青
筠杖身著雲錦裳倒影照滅沒飄飄渡銀潢其中學仙
子面白雙瞳方能讀八瓊書再遣週年芳暮入雷電室
朝窺朱鳥窗被謫向下土不使通綠章真宰遭其怒叱
咤欲發狂見我鳳皇山一別憶廿霜瞳子照人碧十日
飛電光自言得賜還復侍紫極宮去君五百歲共會安

期生別後倘相憶山頭吹玉笙

吳明之既葬乃祖陽岡阡楊仲宏追為墓銘趙子昂喜其才自為書之有詩名湖海者皆為賦詩子容杭意必來徵回賦云

雲來陽岡南雲來陽岡北去者日以悠惻惻復惻惻嗟或冰在盤聚散不可測精神本流通心思豈終極

東隣有佳士壽干彥明

真宰自閑暇控搏天地先賦物如瀉水未嘗致私偏生人分已定上壽滿百年歲月車較鬻責在天者全東隣有佳士美鬣朱庭寬窺見造物意頗得性所安能持讀書暇愛此山水妍結廬在南陸開門湖水邊芙蓉間青

竹日出照碧鮮時時有好客洒掃東頭眠今日復何日置酒花竹間人皆祈公壽我甚哀子賢相見且樂飲怡此好妙顏

九月一日李晉仲張子長張仲舉蔡行之載酒西湖是日會者凡九人分韻得采字

積水生秋陰旭日動晨彩始忻天宇曠稍見川容改騎童屨見招舟子亦相待菱荷紛紛菲菲葭葦青漣漣浮鳥或上下游儵自行隊山岡西北鶩江水東南滙羣賢聚城邑三載隔江海長懷遠繒繳至性同蕙蒞升高露未晞出谷日猶在幽期諒難違黃菊行可采

送王成能生歸番陽

王生頗嗜學從師向江南安用四科續蚤聞吳快叅噲
噲發頭角終歲事討探危坐不出戶專如書中蟬問道
得指畫又間兩席函析理中冒繁時作霜鍾齋諸生坐
刮席對之面發慚詎止白受和何言青謝藍衣半夢倚
閣懷袖饋珍柑明日告歸養思自進旨甘秦淮水方盛
舟楫密如蚕掛颿指彭蠡千里抗江潭入門彩衣趨鄉
黨相媚談南隣喜子歸翁媪饋饜甌古有嗜學子逸樂
不自矧况乃孔子聖猶師剡與岍盛年惜分陰利器淬
矛鋌揚名在本朝後世稱奇男

賦天籟

我登鳳皇山夜半望跋鳥高秋爽氣豁金莖露塗塗青

天一浩蕩掛此白玉壺嵯峨千里冰下連江與湖月脇
亦何有丹桂八九株山河孕靈氣白鬼不受呼仙人騎
鳳皇翩然上清都神女皆青腰共守明珠五老顧之
笑帶劍立玉除歸來夢猶胸醉坐錦纒綸

張本之春暉堂

泰山有嘉樹上與青天齊枝枝濯晨露葉葉含芳姿有
鳥巢其顛羽毛金色芝鳳皇生九子一一好雲儀母食
九子哺母飛九子隨嗟我有父母常願千歲期父兮捐
我去今獨與母居願母加飡飯且勿念兒饑願母增襦
袴勿念兒朱衣壽命懸蒼天蒼天豈無私莫作冬日速
且作春日遲

寄張伯雨

清晨推南窗風雨雜不已別來曾信宿屢起望吾子沈
玄有奴客遺我書一帋新從城中來佳否問何似上言
善眠食下言丞相肯丞相幸康強髮白顏色美我冠藻
米裳赤舄止几几甚高先生賢不用衣青紫歲晚無乃
寒何時戒行李時時問故舊頗及張外史日望西客來
議論得疊疊平生信尼父將老尚泥滓知士乃世用愚
暗不得鼓青黃真木災龜顧塗曳尾珠玉生無脛或自
致千里造物何厚薄得失聊自喜榮華忽萎落妄謂月
出耻自我來江東饜飫好山水西月留句曲善與麋鹿
友薄言霜露初青青見蘭芷亦逢留藥苗終歲竟不死

便欲求神仙誰念走城市終然服名教神怪烏足恃遂
將持子去謀道先博依登樓放長懷發詠天地始憂來
望城郭聊用消迅晷古云佳麗地淮水清且瀾高塚空
麒麟牧豎騎項筆豈無酒可沽亦有魚與鯉亭亭鳳臺
山應落吾樽耳

韓別駕舊宅

會稽韓別駕有宅棗木坊種德累數世上天降善祥屬
歲在壬戌季冬澤已冰女丁媿留害夫壬遂走藏前擁
祝融節從驅風伯從瞋目拔人屋中夜樹絳幢勢延萬
家邑易于燎秋蓬赤子當道號大官救火忙下馬叩頭
祝酷烈不得禳獨遺棗木宅炭若水在傍如聞被帝令

下為逐卑方藝官辭舌根肅然來反風邑子奔走救爭
願與火抗云是別駕宅焦爛甘所蒙虐焰既衰止画簷
照城隍宗禰儼如故稍修屋與墻遺老垂涕道賓客賀
在堂主人出拜客但言天所貺客稱別駕時為善多陰
功視民苦疾烈摩撫劇在躬有子身已貴恂恂比諸生
至孝自天性朴易而寬平能事母夫人受教跪鄉牀居
官號廉潔愷悌如治中後來捐館歲夫人尚無恙諸孫
亦類父好文氣溫良內外無遺言長穉順有恒家與子
錢貸予人不能償是為夫人教義聲日以揚天人一致
耳下報捷影響好德生賢子富貴無咎殃遂令不焚室
及見天賜彰我常造其宅徵客言不空公子皆有道森
強

與杜書史

杜宗多賢人磊落照青史詩書百世澤源源若流水前
年識尊公令復見令子而公身玉雪皎白無泥滓三年
不得見規切長在耳昨日使車至民氣已湔洗斷獄行
郡國六轡清瀟瀟况聞綉衣賢愷悌真父母秋堂耿華
燈民命懸可否上天有報施世世被青紫

次鐸志文韻送之歸武昌

崑崙起西極地勢鬱磅礴洪河盪其胸土裂蒼石削羣
水日夜走風霆無時作泰山天下脊齟齬見容寧升高
望三晉黑子僅錯落風氣得精悍人性盡恢廓每聞青
雲器往往在隱約識子吳楚間貧賤若不樂手弄珊瑚
鈎去欲東採藥我畏與子別十夜夢猶愕男兒竟何物
歲晚或可托北風簸江浪况也蛟龍惡少忍待舟楫送
子岳麓脚

送張信父

秋水清練練秋色在嘉樹登高騁遠望臨別杼情素朝
發梁楚郊莫歷燕代路思君無冬春使我煩夙夜幸辭
案牘勞上直雲霄顧藉之黃金閨寘之白玉署

画史朱好古卷

真宰簸索篇笑睨造化鑪画史天机精竊見造化樞盤
礴解衣縱當窓吃鉛朱沾塗狡兔翰神氣如走珠手掣
巨鰲簪痒痒生肌膚六丁拔山來下無根與株海風吹
之凝纍纍揀江湖其中有幽人傲兀不可呼已知画手
好令我心踟躇五湖風雨夕徑去理釣舟子技亦精絕
白玉無疵瑕誰能薦天子遣之画雲臺一朝被賞識富
貴直萌芽但訪青牛君乞受黃金壺

觀龍鼻水贈天柱欽上人

天根盤海底大浪春其南象山漸萌芽迸出碧玉簪波
濤蝕之半玲瓏兀空龕其陰生玕琪其陽產梗楠絕頂

逼太白纔可一劍函銀河從西來白鳳毛氄氄魚龍撼
不醒醉如臥箔蚕其中黑無底銅杖不可探一綫出山
腹牛乳清而甘清寒漱草木日出香飴飴雲霧急捲去
玉氣射紫嵐千峰碧菡萏春霞散紅酣或黝如蒼壁或
青如倭藍或樹旂杠一或覆鼎足三或挾如怒猊或呀
如洪鈿或如馬奔踈或如虎視眈聳者如樓觀窾者如
瑩甌仰者如箕踞俯者如負擔或螺髻紺目儼雅如瞿
曇或龐眉鮐背偃僂如老眊蹻如天女戲卑如童子參
萬鬼苦劉削天巧未易談招提十八寺過者常脫驂中
有天人師久臥老柏菴法界如塵沙一一毫端含長風
吹遊子鬢毛青盤髮幽尋忽至此佳處苦已諳我家雁

蕩頂擇勝不敢貪但悲食塵子腐作書中鱣相逢一大
笑新詩出長鈇明朝芙蓉路惟聽霜鐘韻

鳳皇在高岡亦在嘉樹林我昔見君子未見君子心心
如朱絲絃可和南風琴願子鼓一曲雜以丹鳳吟一奏
南風至再奏百鳥喑

寄達蕙善

天風起西北堅冰在河水日車寒易側霜露方泥泥居
人塗戶牖日晏猶未起客子將安之行役乃不已平生
丈夫願剪鬢弄弧矢豈不甘陋巷寧能老桑梓近者發
揚州舟楫水上艤幸逢地主賢設擺共遮止張燈轉清

夜高論雜燕喜忽聞故人來如渴飲醪醴三年隔江分
終日候河漢言旋猶望塵失咲或廼爾人生一邂逅亦
復自晤抵明日驅車去不得待行李聞將入臨海相見
亦近耳臨海古壯縣正在天姥裡大山挿青天瓊臺屹
相倚其東見扶桑峻鳥有三趾碧海浸后土東維繞地
底山上多桃花雪霜摧不死我家山之南欲往亦屢矣
因君紫旄節去訪白雲子

贈徐仲禮

泰山有桂樹結根千仞顛上枝撐紫冥下枝凌碧烟高
秋八九月孤香掛青天赤子大如桔飛入黃金盤白鬼
擣靈藥辛苦不敢眠和以白玉屑薌澤腴且鮮仙聖衆
嗽嚙膚革豐如蓮鳳皇未飲啄蛻出彩翮妍何物烟火
腸望之燎飢涎日食五斗塵意欲輕神仙有客東方來
聞之思飄然手招金色鵠去入雲中翮下視食塵者一
笑三千年

謝山人詩卷為崔陽外祖題

憶吾為兒時將命父母傍舅氏袖鉅簡有作似季唐云
是而外祖遺此手澤芳再拜求之讀吾母泣自窓謂兒
幸念我茲文逢爾昌骨目重違隔俯仰三十霜少長粗
知學漸喜攻詞章痛昔川岳裂文氣苦不揚天運久好
還東籜暗復明嗜好徐自定衆川漸趨江及觀葆光篇
悠然超鴻龐張樂軒轅丘鏞磬兼籥笙五絃落吾耳天

上孤鳳鳴南風三萬里吹之散大荒嗟哉彼孰氏出此
驚噴盲重是吾母党外祖始有光母也有遺教感歎涕
泗滂吾今在牛下坐須羽翮成天子正好文去獻明光
宮

送熊祐侍父至京師

我昔為兒時看書不停手十二作文賦點 咏鸚鵡長
者見之駭云出諸父口竊聽樽俎間倔強愈自負寶劍
新出匣其氣動牛斗功意不經意自謂可拾取英華日
韜歛荏苒今白首家居未諸生終歲守戶牖時人不見
收何弄蘭在滄去年應嘉招道路得奔走強顏為人師
設席事授受心知蓋謝青獨喜獲小友虎脊千里姿馭

駘避梁蹂今晨別我去言欲省父母何以祝子行問學
當乘尊翁清郎拜聞暇得時誦男兒志遠夫豈愧綠
淚綬關河歲將晏嚴霜已摧柳層冰碍行舟輶車就官
道平生過齊魯觀禮佐公酒見善思已遷氣質變矯揉
古人惜寸陰歲月屈信肘努力樹明德鑑我遂衰老作
詩不成歌聊與子擊缶

古詩

聖天子龍飛詔被郡國之日四海赤子歡喜鼓
舞布衣臣李孝光輒為古詩七首書之所居巢
以志喜孝光南人也目用南飛覺有安巢鳥為
聲韻次第以自道其鳶飛魚躍之情

青青庭中樹有鳥巢其南戶慵聊自謀飲啄性所甘中
野有繒繳相戒慎勿貪

日出照吾屋政見鷓鴣飛鳴聲甚和樂永懷家人肥兄
弟式相好吾生式相依息勤重自將父母詎可違

冬氣漸開塞百物盡零落中林有貞姿粲然獨先覺尺
蠖通屈信天運不終剝勿言霜露酷熙陽已潛作

明月入我戶照我何所有鐸間有藏書牖下有濁酒吾
雖猷畝居先人所遺守獨念區中人歲月屈信肘錙銖
見芬華丘岳積菑咎野中有老翁平生坂築手武丁勤
夢寐殷商實左右主臣俱聖賢百世所稱首

考槃在澗谷伐垓冥河干利達或忘返處窮亦已難中

夜起太息取琴爲爾彈智士當黽勉仁人良獨安

旭日始旦旦有鳴鳥嚶嚶牡出得飲啄雌完守巢幽人
念茲久尼父詎繫匏先民重自任貴器藉白茅

東方有一士心思恒悄悄日聞天子聖至仁蒙海表陽
春達萌芽百物解苛媿吉人在高位郊陬有鳳鳥

衡門有一士

衡門有一士閉門恒苦飢俯仰良自惜日晏空絃歌小
人未足异君子或見之寧爲蘭玉摧不願蕭艾滋

結廬南山下

結廬南山下頗紆故人轍浮沉各自媚長愧生理拙中
園黃菊花契澗見晚節平生匡濟心敢叙已獨潔豈無

一樽酒可以療飢渴歸哉視汝菊將恐霜露結

中園

中園斬蕭艾幽花發孤妍紛吾窮所諧乃獨叙汝賢豈
無莠李花諒非同心言平生屈大夫不爲人所憐

與范子澤

仁人在高位幽士適中林出處元一致持爾耿介心黃
流受圭瓚秋蘭盈我襟故人既如此朱絃有餘音
夷吾青茆謀仲父四方翰悠哉南山歌夜永何時旦北
風吹短衣千載有餘嘆相見樂酒況也雲雨散
佳菊有芳氣鳴雁忽南征故人在海縣重此話平生
跋黃塵下乃見玉雪清丈夫各有適貴賤定交情

和叔夏賦朝雪

鳥雀不畏人嘖嘖上庭樹蕭條山日黃慄慄江氣暮客
子未得歸天嚴風斷渡

送翁景陽作台州椽

門前五株桃春暮始作花勸汝一杯酒丈夫莫思家
功成持身歸吏民相邀遮男兒自應爾父老慎勿誇

贈岳仲遠

大雅日已遠淫哇不可長素王樹人道作戒存桑中斯
文如綴旒東壁暗復明五絃落吾耳天上孤鳳鳴南風
九萬里吹之散大荒遺音政回薄令我心和平

夢先君二首

皇天政不仁尚忍奪吾父百身不可贖至寶銷為土精
神本流通多夢在父所依依平生歡雞鳴月在戶
父子百世緣父子一日歡一聚復一泮政如水在盤鳴
呼誰為此皇天真少思願欲寄尺書將與地下鬼

和張子約早起

婉婉黃菊花暖暖霜露曉習嬾養性真百慮今已掃衆
人自趨功我獨不此寶夷吾菁茅謀百世聖所討

題溧陽冶城財賦官王吉甫卷

玉山有嘉禾其大聞專車取禾食騏驎三年起晨鳧一
息馳萬里不顧後馬駕終當獻天子啖之以龍芻

送武呈景耀隨伯氏之金華

驅車出東門車行有離聲升高望城郭嘉樹何青青平
生畏離別乃復送子行

寄憲使木齋王公

泰山有嘉樹結根在青天生子赤如日鳳皇巢其顛胡
為廊廟具臥鎮江海濱王事政靡盬驅馬撫百城中夜
載起永懷思致身

鬱鬱孤生松婉婉庭下菊天寒歲將晏况乃霜露酷玉
雪終不渝豈云受命獨君子亦可懷出門望遐

觀弋陽諸公諸題其後東劉國瑞

客有袖短牘過我城南陬云是鄉諸老文字吾所收當
窗取之讀驚喜頻掉頭應接不自疲赤手捕蛟虬往往

與我會殊源忽同流雄文虎鳳躍清詩千里駒才名自
如此咳唾傳九州羣公皆高年老孝非衆仇辭醇殆純
熟智妙足發謀張子吾所畏文成已汗牛徐君金閨彥
綴久華不留碧海連月窟雙袖珊瑚鉤爛熳發竒怪天
公聞之愁署云白玉署足使作者羞顧我方老矣技薄
詎敢酬攬卷三太息深生愧冥搜豈無正始音擊壺歌
不休長恐文獻落見此豈復憂沽酒白門下作賦仲宣
樓放蕩且娛樂焉知敬招裘

送段仲輦之京師赴奎章典書

憶在天曆初先帝圖中興天造固草昧國勢不可凌更
修世祖業實藉衆股肱次第興禮樂厚爵收俊能宮中

樹延閣奎章如日升天球間河圖兼以古豆登煌煌大
寶龜祖武自足繩當時侍黃屋盍簪引其朋長材皆董
賈涕垂錯與弘光輝生被服玉壺貯清水簡拔遺嗣聖
多士日烝烝公子雖後至已作飛黃騰季父在文部天
下士氣增傳家三萬卷載之車上滕強學足致遠重任
力所勝我遊吳楚間識子南城登都會賓客重况聞衆
交稱寧薛為子歌安得酒如澗

送觀志能分韻得更字

銀河復西傾北斗亦西柄江永秋易風日暮蛟龍橫遊
子好結束騎馬事秋送者來如雨川上舟楫盛畏別
不忍發天東掛飛鏡照見別離人獨我心恹恹挽鬚祝

君來持酒勸君更西舫彈琵琶忽作瓶中迸前曲度白
崔後曲妾薄命平生烈士心掩耳不願聽男兒樹聲名
上與古人映願君且自愛聽我洛生詠

與鄭廷舉及其伯氏廷瑞

我行出天台羣山秀如舞大江忽中開金湯結深阻地
勢抱鰲頷人家綴蜂戶東南有秀氣天地此融聚眼中
識鄭君精粹產茲土元方亦雋拔眉秀長鬣古嚴君崔
髮新諸郎鳳毛吐鄭君愛敬客燈火聽夜雨劇談隱民
瘼開口見肺腑方今生民困子亦念此否努力樹明德
非子不與語

送心非鏡上人且寄銘師

北風吹庭樹斜雨入茅屋念子當遠去持酒一相屬文
夫未懷土出戶望遐躅況子浮屠法恩受及予毒中林
有貞姿不見霜露酷久矣秉玉雪豈云受命獨紆哉無
淹留送子出西谷

江海多風雪鴻飛亦冥冥平生好交友十年各飄零相
見會有涯髮髮色復青浮雲日夜去悵望埼山亭長思
讀書地相共聚流螢

送王將軍

栢栢王將軍皎皎青雲姿被服甚妍雅蕙帶白玉佩翺
翔諸公間獨有好羽儀丹鳳五色毛擺落金籠羈歲晚
始食粟閑常苦飢借問何為爾有粟士共之賊曹幸無

事日晏猶絃歌小人或予侮罵之如狐狸至性有如此
詎異吐哺姬吾論天下士爾獨無愧尤天子重愛士豈
復令公遺行哉車戒舟秋風大江陂

題安彝方美政卷

鳳鳴嶧山南鳳鳴含山北自古鳳鳥至恒集有道國其
民皆和樂游泳至仁德此時鳳來鳴百鳥喑以息後來
亦屢集世治乃下食方今天子聖守令拔正直含山得
仁宰宣布上膏澤知民處疾苦念之內休惕為政不猛
戾稍除去蝨賊里無愁嘆聲談宰喜見色復為樹學宮
秀子挾書策民性變醇厚昔曠今遂革嗟哉即鳴鳳何
必五彩翮四疆頗沾塗絃誦事文飾要令作大郡乃始
見立植用之無不宜游刃妙解膏誰能荐天子使一展
羽翼矍矍日初升照耀錦綉臆鳴聲中律呂赤霄意所
適歌風貽其民聊補采詩職

送夏簡伯之京

大堤花黃黃河水清瀾瀾行人驅車去及顧浮雲馳諒
酬四方願焉知懷土悲所嗟予滯留蹉跎髮成絲子齡
止秀好况乃富才思高堂望宿髮努力謀養志違離倘
有念吾詩可絃歌

贈林泉生兄弟

予八月十八日至錢塘廿二日吳明之自三山
來會明日林氏兄弟曰泉生同生亦來假館因

為借仙林僧房居之臨別作此為贈林少年有
才能為時文聞其父頗種德是二子者食其報
者也然二子之瑰竒敦雅非長者正其身歟泉
生字清源同生字清流一字亦流

蟋蟀入牀下鴻雁亦南征江頭送歸客浩蕩萬里情昨
日始識面已覺畏子行蕭蕭一樽酒怡悵不能傾行子
在道路夢見崔髮人懸知燈火夕笑語久啣嚶男子四
方願養志在致身高樹春色滿持子聽流鶯

潘子政具慶堂

滑滑春樹林黃黃萱草花階庭大潔淨老翁長在家壽
媪年六十髮毛黑如鴉起居中禮度平生無嘆嗟大兒

在仕版身為管榷茶小兒讀父書被服生光儀時康出
游衍象兒自將車布席茂林間花木爛交加綠陰映朝
旭微芳蔭晴池衣清雨初霽客至日未斜移榻聞鶯轉
鉤簾見蜂衙諸婦羞甘脆奉觴進流霞羣孫飄錦綉摘
花共迎遮當軒舞佺佺連聲歌白華老翁顧之笑教語
思無邪歌我具慶篇此樂詎可涯

書丘老先生詩軸送蔡石雲縣正

仙家有浮玉六鯨引首扛天地結根蒂日月開八窗石
林千丈碧雲氣樹赤幢駸車不可到羽仙駕飛艘中有
九氣翁髯紫修眉龐大瓢斟玉酒嗽嚙香滿腔而我來
問道心敢擬嘆我髓未洗擣藥開昏矐餉以五彩筆送

以白雀雙歸來疑夢寐恍恍心如撞長思天風起吹渡
萬里紅日暖蛟龍出巨石撐晴江

次江存學遊蓋竹洞天韻

地軸蟠東南水深山幽幽仙人五雲巢皎然隨蠻陬玉
胎白虹暖石壘青髓流羨門安期生壽考天為儔羽譜
翠霓旌光耀夜不收芙蓉白玉童居然導神遊嗟我聞
道晚愛閒復好修生閱千歲來疾如遞書郵神仙不可
學茲焉營一丘伐竹構我屋鑿井洗我眸赤脚紫鳳白
雲翼之浮翻悲赤松子暮年願封留長嘯揮白羽吾將
洗吾愁

同新從矩縣尹宿雁山天柱院

東南地勢下海水復善蓄青天久軒輊獨見斗柄揭古
帝省下土東維或歎缺大靈駿奔走蛟螭改其穴洛水
縮入地萬鬼拔山出想見風雨黑電火上下掣兩柱幾
支撐真宰仰咋舌遂令天行徒不復見詭詭鬼工妙斲
削又不見剗剗日月轉半腹避隱若兩螭我夜臥其傍
戶外白如月開戶天冥冥乍竚立積雪居然混沌素元
氣淡不裂平生山水性念此心屢結緬想萬物初天地
亦萌蘖衆人如螳蟻細大強區別俛仰聊自喻白雪一
怡悅亭午日氣還鳥鳴着青樾我僕膏吾車前路在嵒
嶮

溪行分韻得美字

條風泛輕春野碧潤如雨幽人有新懷相携玩山水岩
花既菲菲溪石亦齒齒意行無前期適趣成坐起况兹
豪俊姿陶寫出妙理東山携杖遊風流未余美持杯勸
松風韶護忽盈耳歸來樂未央題詩寄幽緒

和叔夏觀石梁二首

六丁運神斧鑿此混沌素飛梁跨天來橫絕山中路行
人不敢過白雲自來去長嘯出山門羅衣翠烟暮

青山栖白雲顛倒寫繪素上有仙聖巢下有猿窟路秦
王窺扶桑此物驅不去至今萬世神暗鳴風雨暮

華山有泉石沉碧

玉煖山脉潤雨新花氣薰銅瓶百尺便觸裂塔前雲天

光隨空碧萬象涵無垠蛟龍吐水電松窗絕飛蚊

李五峰集

元 李孝光 著

五言律四十四首

天台道上聞天香

八月天台路清風物物嘉
晴虹生遠樹過雁帶平沙
日氣常蒸稻天香喜釀花
門前五株柳定是故人家

越州郡庠壁和顏氏子韻

歲月渺無涯居然鬢髮華
乾坤難屢旦霜露菊猶花
城裡鑑湖稻山陰日鑄茶
東南好官守行子莫思家

送友人

依依涉野水渺渺渡秋陰
短褐北風急布帆南斗深
行

酬大夫願乃見故人心莫作長回首目風惠好音

祝朱西隱

清氣還天地英靈太颯然年尊幾耳順子孝自心傳星
隕憂高士山頽惜大賢竹西有舊隱草木亦蒼妍

久客寄劉弘度

有客淒涼甚思家少定懽夜深知笛短秋半覺衣單積
水蓴絲滑高田豆葉乾月明星露墜慎莫倚闌干

挽戴春澗

夫子不可作斯文又陸沉平生伊呂夢老去綺園心宇
宙埋雄劍精靈護雅棊猶聞書萬卷自有鳳毛尋

其二

偃蹇經綸手俄殘兩鬢青人間夢霖雨天上失文星暗
咽看麟紱飄颻趁雀翎文章能蓋世祇合自爲銘

江心寺贈唐博士

銀浪舞輕航天風起石塘六鰲扶地勢萬象發天光樹
湧中流碧蓮生隔浦香潭龍莫深臥一雨九州涼

送薩郎中賦得新亭

登高望吳楚芳草滿汀洲離別安足念英雄翻有憂山
河吞故國江漢入秦州今日新亭飲君感滯留

同徐仲禮劉方存在雁山作

北雁山前路扶藜上紫冥山空猿自語雲暖雀初醒詩
妙驚天老棊靈畏瀑腥夜分蕭寺榻南斗下文星

代友人送于彥明之鄞

詩舸幾時發秋風海水腥雲分雁蕩路江繞鮎坵亭天府文星聚名山僧氣靈憑君道問訊無恙讀書螢

送裕上人歸儀興

行尋桂樹隱已與菊花期江永魚龍夕風高鴻雁飢獨憐相見晚况復欲歸時楚雨楓林黑勞予入夢思

陪薩使君志能遊城西光孝院得茶字

入谷向亭午城門已集鴉風沙天易夕霜露菊猶花騎馬尋修竹逢僧問煮茶江南有獨客首夜憶京華

送客

出門嚴鼓後送客入舟時已自傷羈旅令人畏別離江

蟠金楚地山掩小姑祠歲晏多風雪題詩寄所思

次薩郎中題鉄塔寺壁

平生謝太傅勝日得重臨地勢吞吳盡江流入楚深金湯非舊國棟宇尚青林野露團黃菊獨為遊子吟

東林寺

騎馬過東林當塔入綠陰路斜瑤草合雲去落花深老去况獨立興來時一吟數來成故舊相對挽重臨

送郭仲方

莫作匆匆別人生異聚萍官船賢聖酒客帳短長亭恨不車生角毋為井陘瓶蕭齋清夜榻莫負讀書螢

送人

蟋蟀已在宇涼風吹角巾別離低壯士富貴改全人旅
食貂裘敝交游白髮深蕭蕭一尊酒落日大江濱

次韻虞學士見寄

白髮眉山老玉堂清畫間聲名滿天下翰墨落人間才
俊賈太傅行高元魯山獨伶江海客尊酒夜闌珊

匡濟

春風起天際遊子若為情多病仍羈旅令人白髮生山
連三楚壯地入九江平匡濟寧無術栖遲敢自名

送達兼善僉事

相逢九日裡更覺轉離羣倚杖看黃菊升堂望白雲天
星猶耿耿江水止汙汙勸業無勞夢平生有愛君

送王子安上淳安縣石峽書院山長

峽裡淳安縣深山樹學門野人尊俎豆遺老識壘樽茅
屋依山水桃花入水源山中便靜者官秩未須論

癸酉元日前一日歲除立春

昨日春有信今晨春已深江梅白玉湖柳帶黃金作
室兒孫計收書父母心登樓看萬象此亦足清吟

寄勞于彥明自吳歸

去及花時發來逢暑雨沾樹涼人憇午江熱馬行鹽不
畏黃金盡祇愁白髮添君看雙燕子隨意入人簾

冬至日用文字韻

宮中五色線刺綉補天文辰次星珠谷郊嚴羽葆紛隆

平今有象麟鳳動成羣共仰堯天日仍書魯觀雲

留侯

感慨留侯事曾來客下邳手扶仁義主身是帝王師興
漢功居最存韓志可悲如何劫高后反使卯金危

寄夏友伯

長憶浣花宅醉君雙玉瓶春風吹白髮山雨隔青燈臥
病從無客居閒欲似僧何時溪上路倚杖看魚罾

梅邊別墅小酌五人

春色已可愛溪桃花始繁却怜京兆騎來問武陵源山
煖蒸氣氣泉清竹露根羣公招小友文字得重論

次相國魯公鍾山韻

上邑垂紅帶祈僧孕素靈井沉龍虎氣岡斷鳳皇形地
勢通勾曲江源异建瓴懸車南斗下自有老人星

送人

天上迴麟鳳人間下使星相看愧弭節欲發盡揚舲喜
氣通烏鵲平安報脊令韋家有近集送酒玉為瓶

贈能仁寺建禪師

坐此山水癖亂趨麋鹿羣茶香隣屋借芋熟騎童分湖
於兼成澗山高常有雲禪師識道理杯酒得論文

送張子約

繫缺高歌裡丈夫輕別離雞鳴晨行橐燈暗覆殘棋行
矣復何適嗟哉我所思且歸慰妻子莫學五羊皮

次薩使君道林寺壁

詩妙人皆誦才高世不容舊題經在眼新別憶聞鐘市
遠依春樹川明見石春南風洲渚淨幽窟闕魚龍

秋山

更覺秋岑碧能尋勝日躋樹深來鶴窟山斷見虹霓
子行相問幽人去不迷雨餘天姥出吾欲陟丹梯

用韻呈真人

燈明高閣裡今夕重論文歲晏尋黃獨雲生嘆白分
看書當益友把酒畏離羣為客近長至登臺候彩雲

遠山

樓前萬里月窈窕碧峰孤江上自濃淡雲間疑有無
行

人穿亂樹落日界平蕪佇立有真意陰陰鳥自呼

綠水

青春足新雨漪綠上魚矼積翠疑搖眼拖藍欲染衣
雲行天影動風颭日光微竚立無人見沙禽背艇飛

自和寄陳良友

向來詩律進庾謝不枝梧笠子從前瘦梅花未可孤
更憐冬夜寂寧覺壯心無暖日令人喜還勝滿眼沽

代送靳尹

謾說休官去惟公獨見幾玉簫和客恨黃菊待人歸
詩屋天圍座官船月上衣門前五株柳樽酒莫相違

次王宣政園亭

復過高陽社選同北湖尊之自自 拙倒影亦落見孤根愛
日窺南戶春風在北園老翁工種德庭下鳳毛蕃

題元鎮画古木寒林

冬氣漸閉密萬木亦歸根歲晏龍蛇蟄山深雪霰餘物
理不終剥上天諒何言春風一朝至清陰被萬軒

次薩使君題暘曾伯都事幽居

四海暘夫子時歸學灌園兒童散書帙耆舊識壘尊移
竹須逢醉刈葵休斷根升堂定何日凍酒爲余溫

何處難忘酒

何處難忘酒飄零祇自傷狂歌搔白首多病在他鄉秋
雨思魚膾青天看雁行友于深寄意加飯領身強

五馬呈昂夫大尹

五馬何時發聊逢勝日留天晴占鼓角地濕謹衣裘願
試匡時畫歸余理釣舟浮雲浩今古別地望神州

